





५-३-११









# শুদ্ধ-সংহার।




“কালী করালবদনা বিনিক্রান্তাসি পার্শ্বিনী ।  
 বিচিত্রখটাস্থধরা নরমালাবিভূষণা ॥  
 ষোণিচর্মপরিধানা শুকমাংসাত্তৈরবধা ।  
 অতিবিস্তারবদনা জিহ্বাললনভীষণা ॥  
 নিমগ্না রক্তনয়না নাদাপুরিতদিঙ্কুখা ।  
 সা বেগেনাভিপতিতা ঘাতয়ন্তী মহাসূরান্ ॥”

মার্কণ্ডেয় চণ্ডী।

প্রথমখণ্ডে মিত্র প্রণীত।

চতুর্থ সংস্করণ

কলিকাতা



২০১ নং কর্ণওয়ালিস্ স্ট্রীট—বেঙ্গল মোড়ের দ্বারা হইতে

শ্রীগুরুদাস চট্টোপাধ্যায় কর্তৃক প্রকাশিত।

৩

৩৭ নং মেছুয়াবাজার স্ট্রীট—বীণাযন্ত্রে

শ্রীশরচ্চন্দ্র দেব দ্বারা মুদ্রিত।



নাট্যমোদী,

শ্রীযুক্ত বাবু ক্ষেত্রমোহন সা

সুহৃদ্বরেণু—

ভাই !

শুভ-নিশুভের যুদ্ধ অবলম্বন করিয়া মিত্রাঙ্কর পদ্যে এক-  
খানি নাটক লিখিবার জন্য তুমি আমাকে অনেক দিন হইতে  
বলিয়া আসিতেছ, সময়ভাবে ও মনের অস্থিরতার জন্য তাহা  
এত দিন পারি নাই। এক্ষণে এই “শুভ-সংহার” অপার আনন্দের  
সহিত তোমার হস্তে অর্পণ করিলাম।

এই বিষয় অবলম্বন করিয়া অমিত্রাঙ্কর পদ্যে “দানব-দলন”  
নামে একখানি কাব্য অনেক পূর্বে প্রকাশিত হইয়াছিল,—  
“দানব-দলন” কাব্যের অনেক স্থানে সুন্দর ও উচ্চ উচ্চ ভাব  
আছে—কাব্যমোদী মাত্রেরই তাহা আদরের দ্রব্য। কিন্তু  
আক্ষেপের বিষয় যে, এরূপ উচ্চদরের কাব্য জনসমাজে সমুচিত  
খ্যাতি লাভ করিতে পারে নাই। স্থানে স্থানে উক্ত গ্রন্থকর্তার  
সহিত আমার মতের অনৈক্য হইয়াছে ; কিন্তু তথাপি কৃতজ্ঞ-  
তার সহিত স্বীকার করিতেছি যে, “শুভ-সংহার” প্রণয়নে  
“দানব-দলন” কাব্য হইতে আমি অনেক সাহায্য পাইয়াছি।

তোমার

প্রমথ—





# নাট্যোল্লিখিত ব্যক্তিগণ ।

---

## দেবগণ ।

বিষ্ণু, ইন্দ্র, পবন, বরুণ, রবি, যম ও নারদ ।

## দেবীগণ ।

লক্ষ্মী, গৌরী, জয়া, বিজয়া ও পদ্মা ।

---

## দৈত্যগণ ।

ভুস্ত	...	...	...	দৈত্যপতি ।
নিভুস্ত	..	...	...	ভুস্তানুজ ।
বৃন্দলোচন	}	...	...	সেনাপতিগণ ।
চও ও যুও		...	...	
রক্তবীজ		...	...	
সুগ্রীব	...	...	...	দূত ।


## দৈত্য-স্ত্রীগণ ।

ভদ্রা	...	...	...	দৈত্যরাণী ।
শান্তা	...	...	...	নিভুস্ত-পত্নী ।

সখী ও পরিচারিকাদ্বয় ।

---






# ভূ-সংহারা

প্রথম অঙ্ক।

প্রথম দৃশ্য।

বিষ্ণুলোক।



বিষ্ণু আসীন ; বীণায়ন্ত্র সহযোগে নারদ হরিশুণ  
গান করিতেছেন।

লক্ষ্মীর প্রবেশ।

লক্ষ্মী।—প্রণমি, পুণ্ডরীকাক্ষ ! তব পদান্বজে।

বিষ্ণু।—বহু দিন পরে আজি নিরখিহু মরি,

ও সরোজ-মুখ তব সরোজ-আসনা।

উজ্জ্বল হইল মম এ আধার পুরী,

ভিরপিত হল মম মনের বাসনা।

মরি, আজ পূর্ণ হল অন্তরের সাধ ;

চকোরে পিয়াতে সুধা আসিয়াছে চাঁদ।

লক্ষ্মী।—এ সরোজ-মুখ-রবি তুমি, রমেশ্বর !

তিলেক থাকিতে নারি বিনা দরশন,  
যেখানে সেখানে থাকি, আমার অন্তর  
ও রাজা চরণ ধ্যান করে অনু

নারদ ।—প্রণমি, জননি, আমি ও পদ-সরোজে ;—

কৃপাদৃষ্টি রেখ' মাতঃ অভাগা সন্তানে,  
অচলা ভকতি যেন অন্তরে বিরাজে,  
সদা যেন সুখে থাকি হরি-গুণ-গানে ।  
বহু দিন স্বর্গ-ছাড়া তুমি, গো জননি,  
কাদে এ ত্রিদিব-পুরী না হেরে তোমারে ;  
দোহু-প্রতাপ সেই দৈত্য-কুল-মণি,  
রাখিয়াছে তোমারে মা হৈম কারাগারে ।  
হের, মাতঃ ত্রিদিবাসে ! ত্রিদিব-ভ্রগতি,  
দৈত্যদল শাসিতেছে অমর-নিকরে ;  
লাজে নতশিরা যম, অগ্নি, শচীপতি ;  
নিস্তেজ সতেজতনু হের প্রভাকরে ।  
বড় ভাগ্যবান্ সেই দৈত্য-কুলেশ্বর,  
চঞ্চলা অচলা আজি তাহারি আগারে,  
কমলার কৃপাদৃষ্টি দৈত্যের উপর,  
উৎপীড়িতে চিরাপ্রিত যতক অমরে ।  
হতভাগ্য দেবগণে পালি'ছ, জননি,  
করিতে কি দৈত্যদলচির-ক্রৌতদাস ?  
কেন বা অমরগণ অমর না জানি,—

অমরত্ব অমরের করে সর্বনাশ !

লক্ষ্মী ।—বুথায়, নারদ, তুমি যাও এ গঙ্গনা,

পরম ভক্ত মম দেবারি দানব,  
 কত মতে আমারে যে করে আরাধনা,  
 আমি কি বলিঁ তাহা জানেন মাধব ।  
 চঞ্চলা আমার নাম, কাজেও চঞ্চলা,  
 এক স্থানে স্থির হয়ে থাকি না কখন,  
 কখন কোথায় আমি হই না অচলা,  
 নিত্য তুষি নব নব ভক্ত-জন-মন ।  
 তবে যে রয়েছি বদ্ধ গুপ্তের ভবনে,  
 কেবলি তাহার সেই ভক্তি-সাধনায় ;  
 বিনা দোষে ভক্তজনে ত্যজিব কেমনে,  
 উভয় সঙ্কট এবে না দেখি উপায় ।  
 উপায় বিধান এর কর, রমাপতি !  
 আর না থাকিতে পারি তোমা ছাড়া হয়ে,  
 আর না দেখিতে পারি দেবের দুর্গতি,  
 আর না থাকিতে পারি দৈত্যের আলয়ে ।

বিষ্ণু ।—যা বলিলে সত্য,—সেই হুঁষ্ট দৈত্যপতি

ভুজবলে ত্রিভুবন করিয়াছে জয়,—  
 সদা উৎপীড়িছে যত অমর-সন্ততি,  
 হেরিলে অমর-দশা বিদরে হৃদয় !  
 পরাজিত দেবদল দম্বজ-বিক্রমে,  
 দেবপতি পুরন্দর লাজে ত্রিস্রমাণ,  
 দৈত্য-ক্রীতদাস সম বায়ু, অগ্নি, যমে,  
 নিরখিলে কাহার না কাঁদে মন প্রাণ ?  
 তাহাতে আবার সেই দৈত্য হুরাচার,

ত্রিশূলীর বলে বলী ; ত্রিশূলি-রূপায়  
 নিজ রাজদণ্ড-তলে রেখেছে সংসার ;  
 না জানি সে অমরের হবে কি উপায় !  
 আবার কমলা তায় দৈত্যের সহায়,  
 অচলা চিরচঞ্চলা দৈত্যের ভবনে,  
 নিরীহ অমরগণে কি হইবে, হায়,  
 দিবানিশি তাই আমি ভাবিতেছি মনে ।

লক্ষ্মী ।—কি হইবে তবে, হায়, ত্রিদিব-উপায় ?

নারদ ।—না মরিলে দৈত্যরাজ নাহিক উপায় ।

বিষ্ণু ।—আমি কি করিব বল, কমল-আসনে !

রজ্জোগুণে করি আমি সংসার পালন,  
 জীব-নাশ-হেতু আমি হইব কেমনে,  
 না জানি দেবের দশা কি হবে এখন !

নারদ ।—আর কিছু দিন যদি দৈত্য হুঁরাচার,

এরূপ সাম্রাজ্য করে অবনীমণ্ডলে,

উচ্ছিন্ন হইবে তবে এ ভব-সংসার,

কি আর বলিব, দেব, তব পদতলে !

লক্ষ্মী ।—আমিই বা কত দিন দৈত্য-কারাগারে

বন্দিণী হইয়া রব,—কহ, জীবিতেশ ?

কত দিন ও চরণ নয়নে না হেরে

রহিব শুন্তের গৃহে,—কহ, হৃষীকেশ ?

কত দিন রব আর এ ঘোর বিপাকে—

লতিকা পাদপ ছাড়া কত দিন থাকে ?

বিষ্ণু ।—বিরূপাক্ষ-রক্ষিত সে দানবনিকর,

এত দস্ত তাহাদের ধূজ্জটী-কুপায়,  
 ত্রিলোক-সংহার-কর্ত্তা তমোগুণী হর,  
 না বধিলে দৈত্যরাজে নাহিক উপায় ।  
 ভালবাসে ভোলানাথ দানবনিকরে,  
 তাই পরাজিত দেব দৈত্যের সংগ্রামে ;  
 তমোগুণী রুদ্রেশ্বর না বধিলে তারে,  
 কার সাধ্য কেবা বধে এ ত্রিদিব-ধামে !  
 লক্ষ্মী ।—কি হইবে তবে, নাথ, অমরের গতি ?  
 বিষ্ণু ।—কর যাহা বলি আমি তোমায় সম্প্রতি ;—  
 একবার যাও, রমে, তুমি ইন্দ্রালয়ে,  
 জানায়ে ইন্দ্রের মোর আশীষ-বচন,  
 বল গে তাঁহারে যত দেবগণে লয়ে,  
 কৈলাসে শঙ্করী-পাশে করিতে গমন ।  
 ব'ল তাঁরে জানাইতে অম্বিকা-সদন,—  
 দেবের দুর্গতি যত দৈত্য-অত্যাচারে ;  
 দৈত্য-ক্রীতদাস এবে যত দেবগণ,  
 ত্রিদিবে কেহই দৈত্যে আঁটিতে না পারে ।  
 দেবের দুর্গতি শুনি নগেন্দ্র-নন্দিনী,  
 অবশ্যই দেব-দুঃখে হবেন কাতরা,  
 একেই সদাই তিনি রণ-উন্মাদিনী,  
 দৈত্যের বিপক্ষে অসি ধরিবেন ত্বর ।  
 বাধিবে তুমুল রণ উন্মায় দৈত্যেশে,  
 দৈত্যবাণে সতীদেহ ক্ষত নিরখিলে,  
 রুষিবেন সতীপতি দৈত্যের বিনাশে,



ত্বরায় মরিবে দৈত্য ত্রিশূলী কুশিলে ।  
 ইহা ভিন্ন দৈত্যনাশে নাহিক উপায়,  
 ইহা ভিন্ন দেবগণ না পাবে নিস্তার,  
 দৈত্যরাজ সর্বজয়ী বৃজ্জটী-কুপায় ;  
 বৃজ্জটীই করিবেন দৈত্যের সংহার ।

নারদ ।—কি কাজ বিলম্বে আর তবে, অরেশ্বরী ?

চল মোরা যাই ত্বর দেবরাজপুরে,  
 বাসবের মৃতোৎসাহ উত্তেজিত করি ;  
 চল দেবগণে লয়ে কৈলাস-শিখরে ।

লক্ষ্মী ।—আজ্ঞা দেহ যাই তবে ইন্দ্রের ভবনে,  
 অমর-কুলের হিত গাধিবার তরে ;  
 অরুণ, বরুণ আদি যত দেবগণে,  
 লয়ে যাই তুষিবারে দেবী অশ্বিকারে ।

বিষ্ণু ।—পরাজিত দৈত্যরূপে অমরনিকর,  
 টলমল দৈত্যভরে অমরভবন,  
 অমরের হিততরে যাও হে সত্বর,  
 অণুমাত্র বিলম্বেতে নাহি প্রয়োজন ।  
 দেবগণ পাবে ত্রাণ গৌরীর কৃপাতে,  
 তুমিও হইবে মুক্ত কারাবাস হতে ।

লক্ষ্মী ।—প্রণমি, পুণ্ডরীকাক্ষ ! তব পদাশুভে ।

## দ্বিতীয় দৃশ্য ।

ইসলায় ।

### ইন্দ্র ও দেবগণ আসীন ।

ইন্দ্র ।—বল, ওহে দেবগণ, কত দিন আর,  
নীরবে সহিব এই দৈত্য-অত্যাচার ?  
ধিক্ এই দেবনামে, ধিক্ এই স্বর্গধামে,  
দেবকুলে জন্মিয়াছি মোরা কুলাঙ্গার,  
ডুবাইলু দেবনাম কলঙ্কে এ বার !

পবন ।—দৈত্যপতি-ত্রাসে সদা সশঙ্কিত প্রাণ,  
থরথর কাঁপে যত অমরসন্তান,  
কাঁপে এ ত্রিদিবপুরী, কাঁপে যত দেবনারী,  
আকুল সপ্তর্ষিকুল ভয়ে স্তিমিমাণ,  
দৈত্যহস্তে কার(ও) আর নাহি পরিত্রাণ ।

বরুণ ।—দৈত্য-ক্রীতদাস সম যত দেবগণ,  
যোগায় গন্ধের ভার আপনি পবন,  
ত্রাসেতে কম্পিত কায়, দেব-গায়কেতে গায়  
দেবারি শুষ্টের যশঃ পুরিয়া ভুবন,  
দেব-অপ্সরায় নাচে তুষি দৈত্য-মন ।

ইন্দ্র ।—কি ফল, হে দেবদল, আর এ জীবনে ?  
দেবগণ দৈত্যদাস ঘৃষিবে ভুবনে !  
গেছে স্বাধীনতা-ধন, যাক্ রাজ্য, সিংহাসন,

অমরের অমরত্ব ঘুচুক এক্ষণে,

জীৱন্তে এতেক জালা সহিব কেমনে !

রবি ।—দিতি-সুতদলে ভালবাসেন ঈশান,

তিনিহী করেন সদা দৈত্যের কল্যাণ ।

জয়ী দৈত্য দেবরণে, কাহাকেও নাহি মানে,

ত্রিদিবের দেবগণে করে অপমান,—

বিরূপাক্ষ-বলে দৈত্য এত বলবান্ ।

বন ।—বিলাপের আক্ষেপের সময় এ নয়,

ত্রিদিবের স্বাধীনতা চিরলুপ্ত হয় !

আজ্ঞা দেহ, সুরপতি, আমি হ'য়ে সেনাপতি,

সংগ্রামে আহ্বানি দৈত্যে—বিলম্ব না সয়,

ত্রিদিবের স্বাধীনতা চিরলুপ্ত হয় !

দ্বাদশাংশে অংশুমালী মিলিয়া এক্ষণে,

দগ্ধ কর রুদ্ধতেজে দিতি-সুতগণে ।

বরুণ বিস্তারি কায়া, সপ্ত সিদ্ধ উথলিয়া,

প্রবল তরঙ্গাঘাতে বিপুল গর্জনে,

নাশ দৈত্যে ;—দৈত্য-নাম রেখ' না ভুবনে ।

উঠ, ওহে বায়ুপতি দেব প্রভঞ্জন !

নীরব বিষন্নভাবে কেন হে এমন ?

সংহার দৈত্যের বংশ, উনপঞ্চাশৎ অংশ,

একত্র করিয়া রণে করহ গমন,

দানবের দস্ত-তরু কর উৎপাটন ।

ভবিষ্যৎ-অন্ধকারে করিয়া প্রবেশ,

বারেক নয়ন মেলি দেখ, হে জলেশ !

দেখ বায়ু, দেখ রবি, স্বর্গের সৌভাগ্য-দেবী  
 ঘন-ঘনাবৃত্তা ঘোর তমোময় বেশ,  
 ত্রিদিবের স্বাধীনতা হল বুঝি শেষ !  
 চল, ওহে দেবগণ পুনঃ যাই রণে,  
 অত্যাধা,—করি গে বাস নিবিড় কাননে ;  
 বদ্ধ অধীনতা-পাশে, বল কোন সুখ-আশে,  
 দেখাবে কলঙ্কী মুখ সবার সদনে,  
 আপনি দেখিতে ঘৃণা হয় মনে মনে !  
 কেবলি কি দেব-দম্ভ অবনীমাঝারে ?  
 বায়ুর বীরত্ব যত দরিদ্রকুটীরে ?  
 বরুণ নিপুণ হেরি, ডুবাতে সুখের তরী,  
 নিরীহ আরোহী সহ তরঙ্গ-প্রহারে ?  
 রবি-তেজ মর্ত্যে শস্ত্র দক্ষ করিবারে ?

ইন্দ্র ।—শুস্তের ভক্তিতে ভুলি ভোলা মহেশ্বর,  
 দিয়াছেন তারে এই দেবজয়ী বর ।  
 দৈত্য নহে দেব-বধ্য, দৈত্য-বধ দেবাসাধ্য,  
 জিনিতে নারিবে দৈত্যে যতেক অমর  
 প্রাণপণে কল্লশত করিলে সমর ।  
 বিধাতার বিড়ম্বনা দেবের উপরে,  
 আপনি কমলা বদ্ধ দৈত্য-কারাগারে ;  
 শ্রীহীন ত্রিদিবধাম, ঘৃণিত অমর-নাম,  
 হ্রাশা বিজয়-আশা দৈত্যের সমরে ;  
 বিধাতা বিমুখ যারে, কে রক্ষে তাহারে ?  
 তাই বলি, রণে আর নাহি প্রয়োজন,

চল বাই ত্যজি এই ত্রিদিব-ভবন ;  
 দৈত্য-কৃপাধীন হয়ে, দৈত্যের গীড়ন সরে,  
 কি কাজ ত্রিদিবে রয়ে, হে অমরগণ ?  
 এখন দেবের পক্ষে বিধেয় কানন ।  
 কভু না বিফল হবে ত্রিশূলীর বর,  
 বৃথা এই অমরের রণ-আড়ম্বর ।

### লক্ষ্মীর প্রবেশ ।

এস, মা ত্রিদিবেশ্বরী, ত্রিদিবের ক্ষেমঙ্করি,  
 কি হেতু এ কৃপা আজি দাসের উপর,—  
 পবিত্রিলে পদার্পণে অমর-নগর !  
 আছিল, জননি, বদ্ধ দৈত্য-কারাগারে,  
 কেমনে পাইলে মুক্তি কহ তা দাসেরে ?  
 মরেছে কি দৈত্যরাজ, নির্ভর কি হল আজ  
 আকুল অমর-কুল ত্রিদশ-আগারে ?  
 পেলেন কি পরিত্রাণ ধরা দৈত্য-ভারে ?

লক্ষ্মী ।—মরে নি অমর-জেতা হ্রস্ত দানব,  
 সমতেজে শাসিতেছে অমর মানব ।  
 সেই দর্প, সেই দন্ত, ভুবন-সম্রাট শুভ  
 নিরুদ্বেগে সন্তোষিছে অতুল বিভব,  
 আমিও বন্দিনী তথা এখনো বাসব ।  
 ঐশ্বর্যের স্তূপমাকো ঢালিয়া শরীর,  
 ষামিনী-আগমে নিদ্রা যায় দৈত্য-বীর ;—  
 এই অবসরে আমি, ছাড়ি সেই দৈত্য-ভূমি

আসিয়াছি নিরখিতে শ্রীপদ হরির,  
রব যতক্ষণ স্বর্গে রবেন মিহির ।  
বলিয়া এগেছি আমি বিনয়ে নিদ্রায়,  
স্বপন দৈত্যের কাছে যেন নাহি যায়,  
দৈত্যরাজে কোলে করি, কাটাইতে বিভাবরী,  
চেতনা আসিয়া যেন দৈত্যে না জাগায়,  
মরে নি,—নিদ্রিত দৈত্য ক্ষণিক নিদ্রায় ।

ইন্দ্র ।—দেবের উপরে যত দৈত্য-অত্যাচার,  
অবিদিত, জননি গো, কি আছে তোমার ?  
আর না সহিতে পারি, দেহ আজ্ঞা, সুরেশ্বরী,  
যাই ত্যজি সুরপুরী কানন-মাক্ষার,  
দারুণ এ অপমান সহে না গো আর !  
সমুদ্র-মস্থন-কালে সূধা করি পান,  
অমর হয়েছি যত অদিতি-গন্তান ;—  
জীয়ে রব চিরদিন, হয়ে দুষ্ট দৈত্যাধীন,  
চিরদিন সহিব গো এই অপমান,  
মরণ থাকিলে কভু পাইতাম ত্রাণ ।  
মোহিনী মুরতি ধরি কেন নারায়ণ,  
করিয়াছিলেন দেবে অমৃত বণ্টন ?  
কেন দয়াময় হরি, দেবে অমর করি,  
রেখেছেন ইন্দ্রে দিগে স্বর্গ-সিংহাসন ?  
সর্বশ্রেষ্ঠ দেবজাতি কিসের কারণ ?

লক্ষ্মী ।—জানি আমি সব, ইন্দ্র, কি বলিবে আর,—  
দেব-দুঃখে সদা দহে অন্তর আমার !

দেব-দুঃখে নারায়ণ, সদা বিবাদিত মন,  
 চিন্তিছেন চিন্তামণি, হার, অনিবার,  
 কিসে দেবগণ পাবে এ দায়ে নিস্তার ।  
 আমিও তিষ্ঠিতে আর নারি দৈত্যশূরে,  
 দৈত্য-পূজা আর ভাল লাগে না আমারে ।  
 স্বাধীন বিহঙ্গ বনে, থাকে প্রফুল্লিত মনে,  
 ক দিন অধীন হয়ে বাঁচিতে বা পারে—  
 যদিও সে স্থান পায় সুবর্ণ-পিঞ্জরে ?  
 মোর কারাবাস-হেতু আরো চিন্তামণি,  
 চিন্তাবিত, বিবাদিত দিবস যামিনী,  
 তে কারণে আজি মোরে পাঠালেন এই পুরে,  
 শুন, শত্রু, কহিলেন যাহা চক্রপাণি,  
 ভ্রমায় নরিবে তাহে দৈত্য-কুলমণি ।

ইন্দ্র ।—অমরের এমন কি পুণ্যের সঞ্চার,  
 হইবে অমর-ত্রাস দৈত্যের সংহার !  
 তবে দেব চক্রপাণি, দেবের দুর্গতি শুনি,  
 কৃপাময় কৃপা যদি করেন এ বার,  
 তবেই সে দৈত্যহন্তে পাইব নিস্তার ।  
 নতুবা অমরশূন্য হবে স্বর্গধাম,  
 কলঙ্কিত হবে তাঁর কৃপাময় নাম !

লক্ষ্মী ।—শুন শুন, দেবরাজ, না করিয়া কালব্যাজ,  
 সত্ত্বর গমন কর কৈলাস-শিখরে,  
 জানাও গে দেব-দুঃখ দেবী অস্থিকারে ।  
 দেবের এ দশা শুনি, অবশ্যই কাত্যায়নী

পাবেন বেদনা তাঁর কোমল অন্তরে,—  
 করুণা-আধার তিনি এ বিশ্ব-সংসারে।  
 দৈত্যের অটুট দস্ত শুনি ত্রিনয়নী  
 উঠিবেন রণপ্রিয়া রণউদ্ভাদিনী—  
 ভীমা অগ্নি ধরি করে, দৈত্যের সংহার তরে,  
 ধাইবেন রণ-আশে ভৈরবীরূপিণী ;—  
 কে রক্ষিবে দৈত্যরাজে কুশিলে ঈশানী ?  
 হরের পরম ভক্ত দৈত্যচূড়ামণি,  
 নাশিতে ভক্ত-জনে যদি শূলপানি,  
 যদি সেই ভোলানাথ না দেন সমরে হাত,  
 সঙ্কটে পড়িলে তাঁর মানস-মোহিনী,  
 অবশ্য সহায় তাঁর হবেন তখনি।  
 ব্যোমকেশ বৈরিতাবে দাঁড়ালে সমরে,  
 কে আর রক্ষিবে সেই দনুজ-ঈশ্বরে ?  
 মরিবে অমর-ত্রাস, ঘুচিবে অমর-ত্রাস,  
 নির্ভয় হইবে দেব ত্রিদিব-মাঝারে,  
 আমিও সে কারামুক্ত হইব অচিরে।

ইন্দ্র ।—কি চিন্তা মোদের আর, ওগো সুরেশ্বরী !

বুঝিই নির্ভয় আজ হল সুরপুরী :—  
 কমলা সদয়া যারে, সে আর কাহারে ডরে ?  
 সহায় যে অভাগায় আপনি শ্রীহরি,  
 কি ভয় তাহার আর, ওগো শুভঙ্করি ?  
 জননি ! যদিও দয়া হয়েছে তোমার,  
 দয়ার উপর দয়া কর আর বার,



আমা সবে চল লয়ে, কৈলাসে গৌরীশালয়ে,  
তোমা সহ গেলে পাব প্রসাদ উমার,  
তোমা বিনা অমরের কে আছে গো আর ?

লক্ষ্মী ।—আমি গেলে হয় যদি, ওহে সুরেশ্বর !

চল তবে যাই লয়ে যতেক অমর ;  
দেখে আসি অশ্বিকারে, তপোমগ্ন মহেশ্বরে,  
বিলম্ব করো না তবে চলহ সত্ত্বর,  
প্রভাতে করিবে পূজা মোরে দৈত্যবর ।

ইন্দ্র ।—কি কাজ রাখায় আর কাল-ব্যাজ করি,  
বিমান প্রস্তুত ওই হের, শুভকরি !  
তুল ও বরাদ্ব রথে, দেবগণে লয়ে সাথে,  
যাইতেছি পরে তব পদ অনুসারি,  
যাত্রা করি শ্রীহরির শ্রীচরণ স্মরি ।

### তৃতীয় দৃশ্য ।

কৈলাস ।

গৌরী, লক্ষ্মী ও দেবগণ ।

গৌরী ।—ত্যাগিরা কমলদলে, সঙ্গে লয়ে দেবকুলে,  
এ গভীর নিশাকালে কেন, গো কমলে ?  
কি অস্থখ হল পুনঃ, কহ, গো চপলে ?

চিরকাল দেখিতেছি চঞ্চল-স্বভাব,

সুখ-সরে স্থিত তবু সুখের অভাব !

লক্ষ্মী ।—নিশায় না আসি আর আসি বা কখন,

জান না কি পরাধীনা আমি গো এখন ?

বন্দিনী করিয়া মোরে, রাখিয়াছে কারাগারে,

দোদুঃখ-প্রতাপ দৈত্য ত্রিলোক-দমন,—

ভয়ে যার থরথরি কাঁপে ত্রিভুবন ।

চঞ্চল স্বভাব মোর ঘুচেছে, ঈশানি,

হয়েছি পিঞ্জরাবদ্ধা ধ্বতা বিহঙ্গিনী !

নানাবিধ উপচারে, ভক্তিসহ সমাদরে,

সারাদিন পূজে মোরে দৈত্য-কুলমণি,

তিলমাত্র অবকাশ না আছে, জননি !

সুযুগ্ম দানব এবে গভীর নিদ্রায়,

তাই আসিয়াছি এই গভীর নিশায় ।

দৈত্যের অজ্ঞাতে রাতে, আসিয়াছি ত্রিদিবেতে,

যাব পুনঃ রাতে রাতে গোপনে ধরায়,

প্রত্যাষে উঠিয়া শুভ পূজিবে আমার ।

দেখ, ত্রিনয়নি, এবে কি সুখ আমার !

পরাধীনা বন্দিনী যে, কি সুখ তাহার ?

হের পুনঃ, ত্রিনয়নে, দানবের উৎপীড়নে,

সশঙ্কিত দেবকুল স্বর্গের ভিতর,

মলিন লাবণ্যহীন শীর্ণ কলেবর !

দেব-দুঃখ আমি আর দেখিতে না পারি,

বারেক অপাঙ্গে তুমি হের, মা শঙ্করি !

দেবের দুর্গতি যত, হায়, আর কব কত,  
 সে প্রফুল্ল মুখ আর কাহারো না হেরি,  
 ঘোর দুঃখভারে শ্লান অবনত, মরি !  
 একে মহাবীৰ্য্যবান দৈত্যচূড়ামণি,  
 তাহাতে সহায় তার ত্রিশূলী আপনি,  
 ভোলানাথ মহেশ্বর দৈত্যে দিয়াছেন বর,  
 মরণের ভয় এক, তাও নাহি তার,  
 দেবের উপায়, মা গো, নাহি দেখি আর !  
 তোমারই রক্ষিত যত অমর-সন্তান,  
 তোমারই হেলায় ভুঞ্জে এত অপমান !

ইন্দ্র ।—কি আর বলিব, মাতঃ জগত-জননি,  
 বলিতে দুঃখের কথা নাহি সরে বাণী !  
 দুঃখের অর্গলে বদ্ধ, বাক্‌দ্বার সদা রুদ্ধ,  
 মরমে মরিয়া আছি, ত্রৈলোক্য-তারিণি,  
 দেব-ভাগ্যে এত দুঃখ কেন তা না জানি  
 না জানি কি দোষী মোরা তোমার চরণে,  
 না জানি কি অপরাধী ধূর্জটী-সদনে,  
 করিয়াছি কিবা পাপ, কেন এত মনস্তাপ  
 দিতেছ, গো জগদম্বে, যত দেবগণে ?  
 কি দোষে অমরগণে ঠেলিলে চরণে ?  
 দেখ, মাতঃ ! বায়ু, রবি, বরুণাদি সবে  
 তেজোহীন,—অহি যেন হিমের প্রভাবে ।  
 হৃদ্যস্ত দৈত্যের ডরে, কাঁপে সবে থরথরে,  
 ত্রাসে সশঙ্কিত প্রাণ বসিয়ে ত্রিদিবে,

মেলিতে না পারে দেহ এ বিপুল ভবে ।  
 সঙ্কুচিত হয়ে আর রব কত কাল ?  
 অমর না হলে, মাতঃ, ঘৃচিত জঞ্জাল !  
 এ দায়ে পাইতে ত্রাণ, সবে ত্যজিতাম প্রাণ,  
 এড়াতাম এ যন্ত্রণা, এই অপমান,—  
 দৈত্য-ক্রীতদাস ষত অমর-সন্তান !  
 কেন বা অমর করি এত বিড়ম্বনা !  
 কেন বা ইন্দ্রত্ব দিয়ে এতেক লাঞ্ছনা !  
 উচ্চ গিরি-শৃঙ্গে তুলি, অবশেষে দিলে ফেলি  
 অতল সাগর-গর্ভে,—কেন বা না জানি,  
 ইহাই কি ছিল মনে, জগত-জননি ?  
 উগ্রচণ্ডা তুমি, মাতঃ, দানব-দলনী,  
 দেব-হিতে সদা রতা অমর-নাশিনী ।  
 দেবভ্রাতা মহেশ্বর, মহাকাল বিশ্বস্তর,  
 কোথা সে নামের গুণ, ভুবনকল্যাণি !  
 নিজ নিজ ধর্ম্ম দোহে ভুলিলে, ঐশানি ?  
 হৃষীক মহিষাসুরে মর্দিলে, জননি,  
 কোথা সে মহিমা তব, মহিষমর্দিনি ?  
 তুমি, মাতঃ, আদ্যা শক্তি, কোথা তব সেই শক্তি—  
 অমর-নিকর-রিপু-বিক্রম-ভঙ্গিনী ?  
 কোথা সেই তেজঃ তব, সমর-রঙ্গিনি ?  
 শুস্তের সৌভাগ্য-তেজে বুঝি সে শক্তি,  
 মন্দীভূত, তিরোহিত হয়েছে সম্প্রতি !  
 মোদের হর্ভাগ্য তরে, ভুলিয়াছ আপনারে,

দেখেও না দেখে এই দেব-অপমান,  
 মোদের লাঞ্ছিত দৈত্য তোমা বিদ্যমান !  
 মোরা চির-অনুগত, তব চির-পদাশ্রিত,  
 আজন্ম সেবিয়া, হায়, ও পদ-কমল,  
 অবশেষে, জগদন্বে, এই হল ফল ?  
 নিরীহ অমর-কূলে, দুঃখ-নীরে ভাসাইলে,  
 তবু ও চরণ তব শিরে ধরে আছি,  
 দেখি, কি তোমার ধর্ম, বাঁচি কি না বাঁচি !  
 নিস্তার, মা নিস্তারিণি অন্বিকে ঈশানি,  
 পাষণ-নন্দিনী বলে হয়ো না পাষণী ।

গৌরী ।—ক্লান্ত হও, ইন্দ্র, আর হয়ো না ব্যাকুল,  
 ক্লান্ত হও, শান্ত হও, হে অমরকুল !  
 বুঝিয়াছি দৈত্য-পতি, পামর পাষণ্ড অতি,  
 হরের প্রসাদ লভি অমর-নিকরে  
 উৎপাড়িছে দিবানিশি ঘোর অত্যাচারে ।  
 কার সাধ্য কে বা স্পর্শে মম রক্ষা জনে,  
 এই ধরিলাম অসি দৈত্যের নিধনে,  
 এখনি যাইব রণে, কার সাধ্য ত্রিভুবনে,  
 দানবের রক্ষা-হেতু আমারে নিবারে !  
 এখনি দৈত্যের দস্ত খণ্ডিব সমরে ।  
 দেখিব কতই বল তার বাহুদ্বয়ে,  
 দেখিব কতই তার সাহস হৃদয়ে,  
 দেখিব সে হর-ভক্ত, সমরেতে কত শক্ত,  
 দেখিব তাহারে হর রক্ষিবে কেমনে !

স্বয়ং ধরিয়া অসি চলিলাম রণে ।  
 হে ত্রিদিব-বাসিগণ ষতেক অমর !  
 বাও নিজ নিজ স্থানে ত্যজি দৈত্যডর ।  
 তোমাদের হিত-তরে, ধরিলাম অসি করে,  
 ত্বরায় দানবকুল করিব সংহার,  
 বিনাশিয়া দৈত্যরাজে সাত্ত্বিব সংসার ।

ইন্দ্র ।—সার্থক জীবন আজ, মানস সফল,  
 বুঝিহু নির্ভয় আজ হ'ল দেবদল ।  
 চল রবি, চল বায়ু, দানবের পরমায়ু  
 এত দিনে হ'ল শেষ বুঝিহু নিশ্চয়,  
 আপনি অভয়া দেবে দিলেন অভয় ।  
 বাই তবে মোরা সবে নিজ নিজ স্থানে,  
 প্রণমি, জননি, তব অভয় চরণে ।

গৌরী ।—বাও, হে অমরগণ ! নির্ভয় অন্তরে,  
 হৃদান্ত দানবপতি মরিবে অচিরে ।

[দেবগণের প্রস্থান ।

লক্ষ্মী ।—অনুমতি দেহ মোরে, বাই পুনঃ শুভাগারে,  
 দেখে সচেতন উষা উদয়-অচলে,  
 উজ্জ্বল কিরীট ওই শোভে উষা-ভালে,  
 হের মাতঃ, পূর্বপথে, অরুণ উঠিছে রথে,  
 ত্বরায় যাবেন রবি বিশ্ব আলোকিতে,  
 দেহ অনুমতি, মাতঃ, বাই গো মরতে ।

গৌরী ।—বাও, গো চঞ্চলে, আমি আশীষি তোমায়,  
 দৈত্য-কারাগার-মুক্ত হইবে ত্বরায় ।

# দ্বিতীয় অঙ্ক ।

## প্রথম দৃশ্য ।

বিক্র্যাচল—শুস্তের প্রমোদ-কানন ।

গৌরী, জয়া ও বিজয়া ।

বিজয়া ।—দেখ্ লো দেখ্ লো জয়া, সেজেছেন মহামায়া,  
ভুবনমোহিনী-রূপে মোহিয়া ভুবন,  
আলোকিয়া রূপ-তেজে দৈত্য-উপবন ।  
দেখ্ লো রূপের আভা, চমকে বিজলী-প্রভ  
মার্জিত সুচারু তনু সুন্দর বদন,  
মেঘযুক্ত শশী যেন উজলি গগন ।  
দেখ্, সখি, একবার, সুরূপের একাধার,  
গিরিনিরে বিকসিত কনক-কমল,  
উজলিত আলোকিত আজি বিক্র্যাচল ।  
মরি, কি মোহিনী শোভা, রাঙ্গায় রাঙ্গার আভা,  
অলঙ্কৃত-সুশোভিত রাঙ্গা পা দুখানি,  
উজ্জ্বল নখরে শোভে শত নিশামণি ।  
দেখ্ সখি, দেখ্ রঙ্গে, অঙ্গরাগ চারু অঙ্গে,  
উজ্জ্বল মাধুরীময় সুবমার খনি,  
সোহাগে কাঞ্চে মরি বেড়িয়াছে মণি !

জয়া ।—মোহিনী মানবী-বেশ, নাহিক রূপের শেষ,  
একটি নয়ন মরি গিয়াছে মিলায়ে,  
ঘুরিছে অপর দুটি ভুবন ভূলায়ে ।

বিজয়া ।—সুমার্জিত, উজ্জলিত, সুগন্ধিত, বিকুঞ্চিত,  
বিমুক্ত চিকুর-দাম, বিমুক্ত কুন্তল,  
প্রাতঃসৌরকরে এবে করে ঝলমল ।  
শঙ্করের শিরোপরে, বহে কলকল স্বরে,  
চঞ্চল-সলিলা গঙ্গা শুভ্রাঙ্গী তটিনী,  
তরল-রজত-স্রোতঃ তরঙ্গ-রঙ্গিনী ।  
হের শঙ্করীর শিরে, বহিতেছে ধীরে ধীরে,  
চঞ্চলা তরঙ্গায়িতা কৃষ্ণা তরঙ্গিনী,  
চুসিছে আছাড়ি পড়ি রাজা পা দুখানি !

জয়া ।—নিদ্দিয়া চল্লিকা-ভালে, চারু ললাটিকা জলে,  
সীমন্তে সিন্দূর-বিন্দু চিত্রিত যতনে,  
হেন রূপ আর কভু হেরি নি নয়নে !

বিজয়া ।—হরির মোহিনী-বেশ, নিরখিয়া ব্যোমকেশ  
প্রমত্ত চঞ্চল-চিত্ত আকুল পরাণ,  
কোথা পালাবেন হরি না পান সন্ধান :—  
না জানি এরূপ হেরে, কিবা ঘটে মহেশ্বরে,  
তাই বলি, ওলো জয়া, হও সাবধান,  
সাবধান,—হর যেন না দেখিতে পান ।

গৌরী ।—যা হোক, লো সহচরি, যাও দৌহে ত্বর করি,  
বিলম্ব করো না আর এই উপবনে,  
এখনি কেহ না কেহ আসিবে এখানে ।



জয়া ।—আয়, লো বিজয়া, আয়, বাই তবে হুজনায,  
কৈলাস-শিখরে এবে চঞ্চল চরণে,  
দৈত্য দেখিলেই দেবী পশিবেন রণে ।

বিজয়া ।—দাঁড়া লো দাঁড়া লো, জয়া, সাজাই ও চারু কায়া,  
রমণীর গিরি-জাত বিবিধ প্রস্থনে,  
সুন্দর শোভিবে সতী কুমুম-ভূষণে ।

গৌরী ।—প্রয়োজন নাই ফুলে, দেখ লো উদয়াচলে,  
বসেছেন রবিদেব জগত জাগাতে,  
তুরায় কৈলাসে গিয়ে দেখ ভোলানাথে ।

বিজয়া ।—যাই, গো অশ্বিকে, তবে কৈলাস-অচলে,  
হেথা তুমি থাক বসি অচলের কোলে ।

[জয়া ও বিজয়ার প্রস্থান

গৌরী ।—(পরিক্রমণ করিতে করিতে, দগত)—  
সমগ্র স্বভাব-চিত্র চিত্রিত এখানে,  
শোভার ভাণ্ডার হেরি এই উপবনে ।  
হতভাগ্য দৈত্যপতি । হয়ে পৃথিবীর পতি,  
তবুও ঐশ্বর্য্যতৃষা মিটাতে নারিলি ?  
শেষে অমরের ঘোর দুর্গতি করিলি ?  
নিজ বর্ষ্য্যদোষে হুঁষ্ট, আপনি মজিলি !

দূরে সূত্রীবের প্রবেশ ।

সূত্রীব ।—(দগত)—

শুভ ত্রিলোকের রাজা, তুলি যার জয়ধ্বজা,  
অকুত-সাহসে আমি ভ্রমি ত্রিভুবনে,

নগরে নগরে গ্রামে পৰ্বতে কাননে ।  
 আজি তাঁর উপবন, অগ্নিময় কি কারণ ?  
 এ হেন হিমালী-মাকো কিসের অনল ?  
 অগ্নি এ ত নয়—এ যে আলোক বিমল !  
 বিমল উজ্জ্বল অতি, উত্তাপবিহীন জ্যোতিঃ,  
 ভুলিয়া গোলোকে বুঝি উতরিমু আসি,  
 কিম্বা ব্রহ্মলোকে হেরি এই তেজোরাশি ।

( পরিক্রমণ )

গিরি-অধিত্যকা-দেশে, বিমল নিব্বরি-পাশে,  
 এ কি এ ? কামিনী এক, নবীনা যুবতী !  
 ইহারি রূপের এই সমুজ্জ্বল জ্যোতিঃ !  
 কিবা রূপ, আহা মরি, উজ্জলিত বিদ্যাগিরি,  
 রূপের জ্যোতিতে মরি ধাঁধিতেছে আঁখি !  
 ভ্রম এ ত নয় ?—আঁখি রগড়িয়া দেখি ।

( নয়নমর্দন )

না, আমার ভ্রম নয়, কামিনীই হুনিচ্চর,  
 ওই যে বরাদ্বী বসি উজ্জ্বল-আকারা,  
 জলের ফোয়ারা-পাশে রূপের ফোয়ারা !  
 নতশিরে হেঁটমুখে, একদৃষ্টে কি ও দেখে ?  
 হু রূপের প্রতিবিশ্ব পড়িয়াছে জলে,—  
 তাই দেখিতেছে কর রাখি গগুতলে ?  
 চারু অশ্রুমাঝ ডালি, হৃদয় বদন তুলি,  
 কি দেখিছে ইতস্ততঃ চাহি শূন্যপানে ?  
 শুনিতেছে বুঝি দূর কোকিলের গানে ?

পলকে চাহিতে মরি কাড়ি নিল মন,  
কেমনে ঘাইব ত্যজি এই উপবন !

(প্রকাশে)—

কে গা তুমি, সীমন্তিনি, কেন হেথা একাকিনী ?  
কোথায় বসতি ? তুমি কাহার রমণী ?  
দৈত্যের প্রমোদবনে বসি কেন, ধনি ?  
দৈত্য-পতি-দূত আমি দেহ পরিচয়,  
সত্য কহ সব মোরে, কিছু নাহি ভয় ।

গৌরী ।—কি জিজ্ঞাস, দূত ! তুমি ?—কাহার রমণী আমি ?  
আমারে যে ভজে আমি তাহারি রমণী ।  
জিজ্ঞাসিছ বীরমণি, হেথা কেন একাকিনী ?  
শুধু হেথা নয়, আমি চির-একাকিনী ।  
জিজ্ঞাসিছ দৈত্যবর, কোথায় আমার স্বর ?  
সত্যই কহিব আমি তব সন্নিধানে—  
সর্বত্র আমার বাস যে দেখে যেখানে ।

সুগ্রীব ।—দৈত্য-পতি-দূত আমি, যে কথা কহিলে তুমি,  
কিছু না বুঝি, ধনি, কহি স্থনিশ্চয় ;—  
কি কহিব দৈত্যরাজে তব পরিচয় ?

গৌরী ।—বলিলাম আমি বাহা, দৈত্যরাজে বল তাহা,  
ইহার অধিক মোর পরিচয় নাই,  
যা কহি, দৈত্যরাজে বল গিয়ে তাই ।

সুগ্রীব ।—থাক তবে তুমি এই অধিত্যকা-দেশে,  
কহি গে ইহাই তবে আমি সে দৈত্যেশে ।

## দ্বিতীয় দৃশ্য ।



দৈত্য-সভা ।

শুভ ও নিশুভ প্রভৃতি উপবিষ্ট ।

সুগ্রীবের প্রবেশ ।

শুভ ।—কহ, দূত ! কোথা হতে আসিলে এখন ?

সুগ্রীব ।—রাজকর আদাইয়া ভ্রমি ত্রিভুবন,

উপনীত দাস এবে এ সভামণ্ডপে ।

হে রাজন্ ! যেথা যাই, করি দরশন,

সকলেই নতশিরঃ তোমার প্রতাপে ।

হে রাজন্ ! তব যশঃ দীপ্ত চারি ধারে ;

সকলেই তব যশঃ উচ্চ রবে গায়,

অন্দরে কন্দরে আমি ফিরি তব জোরে,

আমার অগম্য স্থান না আছে ধরায় ।

কিঙ্ক বড় অপকৃপ হেরিনু নয়নে,

হে দানবপতি, তব প্রমোদকাননে ।

শুভ ।—কিরূপ সে অপরূপ কহ, দূত, শুনি ?

সুগ্রীব ।—রাজকার্য্য সমাপিয়া, প্রভাতসময়ে

রথ সহ বিজ্যাচলে আইনু যখন,

হে দানবপতি ! তথা হেরিনু বিস্ময়ে,—

দিব্যালোকে আলোকিত তব উপবন,

উজ্জ্বল উত্তাপহীন আলোক বিমল,  
 বলসে না সে উজ্জ্বল্যে কাহার(ও) নয়ন,  
 ভাবিলাম কোটি চন্দ্র ধরি বিক্ষ্যাচল,  
 রাখিয়াছে তুষিবারে তোমারে, রাজন্ !  
 প্রথমে কিছুই চক্ষে দেখিতে না পেরে,  
 ভ্রমিলাম শৃঙ্গে শৃঙ্গে খুঁজি ইতস্ততঃ,  
 অবশেষে, হে রাজন্ ! দেখিলাম চেয়ে  
 একটি নারীর রূপে দিক্ আলোকিত !  
 অধিত্যকা-দেশে, তব বিহার-উদ্যানে,  
 বসিয়া বিনোদবেশা নবীনা যৌবনী,  
 বিস্তৃত বিপুল কেশ, হাসি সুবদনে,  
 যেন কৃষ্ণ নব ঘন-কোলে সৌদামিনী ।  
 অনুমানি হেরি তার পীনোন্নত স্তন,  
 (যৌবন-আগমে নারী-হৃদয়ের শোভা)  
 ফাটিয়া পড়িছে তার নবীন যৌবন,  
 দানব, মানব, মুনিজন-মনোলোভা ।  
 কখন কুসুমপাশে বসি সেই বালা,  
 দেখিছে কুসুমকলি ফুটিছে কেমনে,  
 কখন বা ত্রস্তভাবে উঠিয়া চঞ্চলা,  
 শুনিছে বিহঙ্গগান চাহি শূন্যপানে ।  
 হারায় বিজলী-ছটা, চঞ্চল চরণে,  
 ধরণী উপরে মরি লুটায় অঞ্চল,  
 ভ্রমিতেছে ইতস্ততঃ প্রমোদ-কাননে,  
 অধীরা যৌবনভরে সঙ্গা সচঞ্চল ।

হে রাজন্ ! সে রূপের নাহি দেখি ওর.

আপনার ভাবে ধনী আপনিই ভোর !

শুভ ।—কি বলিলে, দূত ! তুমি ? সত্য কি সকলি ?

সত্যই কি দেখিয়াছ সেই মহিলারে ?

এমনি তাহার রূপ রয়েছে উজ্জল

প্রমোদ-কানন মম ? সত্য বল মোরে ?

সুগ্রীব ।—হে রাজন্ ! তুমি মোর মস্তকের মণি,

কি আর কহিব, প্রভো ! তোমার চরণে,

স্বচক্ষেই দেখিয়াছি আমি সে রমণী,

অধিত্যকা দেশে, তব প্রমোদ-কাননে ।

কামের বিহার-ভূমি সে নারী-রতন,

মন্থ-মানস-সরঃ নয়নযুগল,

আনন্দে খেলিছে তথা অশান্ত মদন,

ভরা যৌবনের ভরে সদা সচঞ্চল ।

বরাজীব গণ্ডযুগ রক্তশতদল,

মন্দার-কুমুম-শোভা চারু ওষ্ঠাধরে,

বিলুপ্তিত মুক্তকেশ করে ঝলমল,

বিভ্রমে ভ্রমিছে ভূঙ্গ আনন্দ অন্তরে ।

আর কি কহিব, প্রভো ! তব সন্নিধানে,

অন্তরের ভাব সব রহিল অন্তরে,

আঁধি যা দেখেছে, তাহা না আসে বদনে,

বিধির অপূর্ব সৃষ্টি অবনী-মাঝারে ।

অবাক হইলু আমি রমণীরে হেরে,

তারি রূপচ্ছটা দেশ করেছে উজ্জ্বল,

জিজ্ঞাসিতে যাই, মুখে কথা নাহি সরে,—  
 দিয়াছিল বাক্যদ্বারে কে বুঝি অর্গল ।  
 মরি, কি রূপের ছটা হতেছে বাহির,  
 আলোকিত যাহে মোর মানস-মন্দির !


শুভ ।—দূত ! সূচহুর তুমি,—কেবলি কি তারে  
 দূর হতে নিরখিয়া ফিরিয়া আসিলে ?  
 কেবলি ইহাই কি হে বলিতে আমারে  
 উপনীত হইয়াছ এই সভাতলে ?

নিশুভ ।—একাকিনী কেন বামা বিদ্যাচল-শিরে ?  
 কোথায় বসতি তার ? কাহার রমণী ?  
 জিজ্ঞাসিয়াছিলে কি হে সেই মহিলারে,  
 কি মানসে উপবনে বসি সেই ধনী ?

সুগ্রীব ।—তোমাদের বলে বলী আমি, দৈত্যমণি !  
 আমি কি ডরাই কারে এ বিশ্ব-ভুবনে ?  
 কেনই বা ডরাইব দেখি সে রমণী ?  
 সূধায়েছি সব তারে সেই উপবনে ।  
 কহিল রমণী মোরে মধুর বচনে ;—  
 “আমারে যে ভজ্জে, আমি তাহার রমণী,  
 সর্বত্রই বাস মোর যে দেখে যেখানে,  
 সাথী নাহি মোর, আমি চির-একাকিনী ।”

শুভ ।—সুগ্রীব ! বিলম্বে তবে নাহি প্রয়োজন,  
 আর এক বার যাও বিদ্যাগিরি-শিরে,  
 কহ গে সে মহিলারে, আদরে এখন  
 ত্রিলোকের পতি শুভ ভজ্জিবে তাহারে ।

যে ভজে বামারে বামা তাহারি রমণী,  
 যাও, হে স্নগ্ৰীব যাও বল গে তাহারে,—  
 ত্রিলোকের পতি শুভ দিবস যামিনী  
 ভজিবে তাহারে সদা পরম আদরে ।  
 দেবগণ নতশিরঃ যাহার চরণে,  
 সে তারে রাখিবে তুলি নিজ শিরোপরি ।  
 রাজস্ব যাহার এই বিপুল ভূবনে,  
 সে তারে করিবে মন-রাজ্যের ঈশ্বরী ।  
 ভাল করি বুঝাইয়া সে নারী-রতনে,  
 স্বরায় আনহ তুমি মম সন্নিধান,  
 অশ্ব, গজ, রথ, কিস্তা শিবিকারোহণে,—  
 বাহাতে সে আসে, যাহা চায় তার প্রাণ ।  
 স্বরায় ফ্রেশন আর করো না সময়,  
 স্বরায় আইস ফিরি বিলম্ব না সয় ।  
 স্নগ্ৰীব ।—কেন বা বিলম্ব হবে, ওহে দৈত্যমনি !  
 এখনি যাইব তব আজ্ঞা ধরি শিরে ;  
 এখনি লইয়া আসি সে কোঁস্তুভ-মনি,  
 দোলাইব তব গলে আনন্দ অন্তরে ।  
 শুভ ।—অবিলম্বে আন গিয়ে তুমি সে বামারে ।



[স্নগ্ৰীবের প্রস্থান

নিশ্চয় ।—(স্বগত)—

সম্মুখে ভেটিতে ভীত কুমতি মদন,  
 দূত-বাক্য ছদ্মবেশে পরিচয়



শ্রবণ-বিবর দিয়া হায় রে, এখন,  
দানবপতির প্রেম-বিমুক্ত অন্তরে !

### তৃতীয় দৃশ্য ।

বিজ্যাচল—প্রমোদ-কানন ।

( গৌরীর ইতস্ততঃ পরিক্রমণ )

সুগ্রীবের প্রবেশ ।

সুগ্রীব।—কি, গো ধনি ! কি করিছ ? কি ভাবে ভ্রমিছ ?

আবার এলাম আমি তোমায় দেখিতে ।

হেটমুখে একদৃষ্টে ফুলে কি দেখিছ ?

রূপের কি প্রতিবিম্ব পড়েছে উহাতে ?

রূপের সাগর তুমি, ওগো বিনোদিনি,

চাপল্য তরঙ্গে সদা সচঞ্চল ভাব,

কি রূপ আবার তুমি দেখিতেছ, ধনি !

ও বরাজে রূপের কি আছে গো অভাব ?

ঈষৎ হাসিছ কেন আমারে হেরিয়া,

উজ্জ্বল রবির বিভা মলিন করিয়া ?

গৌরী।—এই যে আসিয়াছিলে, কি হেতু আবার ?

খুলিয়া বল না কেন নিজ অভিপ্রায়,

একাকী আসিছ কেন হেথা বার বার,

সুগ্রীব ।—শুন শুন, সুবদনি ! শুন সমাচার,  
 বড় ভাগ্যবতী তুমি, ওগো রসবতি,  
 খুলিয়া মনের কথা কহি এই বার—  
 তব প্রেমাকাজক্ষী.শুভ ত্রিলোকের পতি ।  
 যে জনের কীর্তিরাশি ব্যাপ্ত ত্রিভুবনে,  
 যার বাণে জর জর অমরনিকর,  
 তোমার লাগিয়া আজি শুন, সুবদনে !  
 মদনের শরে তার জর্জর অন্তর ।  
 এস মোর সাথে, আমি তোমাতে লইয়া  
 যাই দৈত্যপতি-পাশে ; প্রফুল্ল অন্তরে,  
 ত্রিলোকের আধিপত্য—মুকুট ফেলিয়া,  
 তুলিয়া লবেন তিনি মস্তকে তোমাতে ।

গৌরী ।—এই কি মনের কথা, দূত হে, তোমার ?  
 এসেছ কি তুমি মোরে লইবার তরে ?  
 কিন্তু শুন, পণ এক আছে হে আমার,  
 পূরণ হইলে তাহা যাইব অচিরে ;—  
 জিনিতে পারিবে মোরে যে জন সমরে,  
 সবলে লইতে মোরে পারিবে যে জন,  
 যে জন পারিবে মোর দর্প হরিবারে,  
 তারেই করিব আমি পতিত্বে বরণ ।  
 বল গিয়া দৈত্যনার্থে এই মোর পণ,  
 বিনা যুদ্ধে এক পদ নড়িব না কভু ;  
 সাধ্য থাকে আমি সহ যুবু ন এখন,—  
 দেখিব কেমন বীর তোমার সে প্রভু ।

রণে পরাভবি মোরে, বাসনা যথায়  
 লয়ে যান, যাব আমি অবতন-শিরে,  
 যথা রাখিবেন, আমি রহিব তথায় ;  
 এই পণে রণে আমি আত্মানি হে তাঁরে ।

সুগ্রীব ।—সে কি, ধনি ! সে কি কথা ! “রণ” কি বলিছ ?

জান কি, সুন্দরি, তুমি কারে বলে রণ ?  
 পাগলের মত তুমি ও কথা তুলিছ—  
 হাসি পায় শুনে তব হৃষ্টিছাড়া পণ ।  
 নয়ন-বাণেতে তাহা হয় না সাধন,  
 বিশেষ দৈত্যের সহ,—নির্ম্মম নির্দয়,—  
 চাহিয়া দেখে না তারা সমরে যখন,  
 সুচারু নয়ন কিম্বা উন্নত হৃদয় ।  
 কোমলাঙ্গি ! শত্রুযুদ্ধ সাজে কি তোমারে ?  
 কাতরা ছিঁড়িতে তুমি কুসুমের দল ;  
 পবন ঈষৎ যদি প্রবলতা ধরে,  
 ব্যথিত করে গো তব বরাজ কোমল ।  
 দানবের বজ্রবহ্ন সেনাগণ সহ  
 কেমনে যুঝিবে তুমি তাহা নাহি জানি !  
 কোমল-মৃণাল-ভুজে কেমনে তা কহ,  
 ধরিবে আয়ুস-অস্ত্র বল, বরাননি ?  
 ভ্রমিতে কুসুমবনে স্বেদাক্ত শরীর,  
 কেমনে সহিবে তুমি সময়ের ক্রেশ ?  
 হানিবে ভীষণ বাণ যত দৈত্যবীর,  
 পাষণ-ছদ্ম তাহা, নাহি দয়া-লেশ ।

যুদ্ধ কি মুখের কথা, ছেলে-খেলা, ধনি !  
 ছাড় এই সর্ব্বনেশে সৃষ্টিছাড়া পণ,  
 আপনার নাশহেতু হইয়া আপনি,  
 বিষম পাতকে, ধনি, হয়ো না মগন ।  
 ভালয় ভালয় এস আমার সহিত,  
 লয়ে যাই তোমারে গো পরম আদরে,  
 দৈত্যনাথ সহ সেথা হইবে মিলিত,  
 চাঁদে চাঁদে মিল যেন হইবে সংসারে ।

গৌরী ।—বৃথা বাক্যব্যয়ে, দূত, নাহি প্রয়োজন,  
 বল তুমি গিয়ে সেই দম্বজ-ঈশ্বরে,—  
 কতু না লজ্জন হবে মোর দূত পণ,  
 জিনিবে যে মোরে, আমি বরিব তাহারে ।  
 ডাক আনি দৈত্যনাথে সহ দৈত্যদল,  
 আসিয়া যখন তিনি অবলার সনে,  
 দেখিবে তখন এই নারী-ভূজ-বল,  
 দেখিবে দানবগণ মরিবে কেমনে ।  
 দানবের বজ্রবন্ধ বিদ্ধি অবহেলে,  
 ভাসাব শোণিত-স্রোতে দৈত্য-অনৌকিনী,  
 দৈত্য-সেনাপতি সহ ভীষণ অনলে  
 পোড়াইব দৈত্যরাজে অগ্নিবাণ হানি ।  
 বিশ্বজয়ী দৈত্যদল পশিলে সমরে,  
 নিবিড় শরের জালে ছাইব সংসার,  
 বধির করিব সবে কোদণ্ড-টঙ্কারে,  
 রোধিব বায়ুর গতি দেখাব আধার ।

সুগ্রীব ।—অবাক্ হইনু, ধনি, শুনি এই কথা ;  
 না জানি, কি আছে মনে তোমার, সুন্দরি !  
 কিন্তু ভাবিলেও মনে পাই বড় ব্যথা,  
 ও বরাক্স অজ্ঞাঘাতে কলঙ্কিবে, মরি !

গৌরী ।—বুখা বাক্যব্যয়ে, দূত, নাহি প্রয়োজন,  
 বল তুমি গিয়া সেই দম্বজ-ঈশ্বরে,—  
 কভু না লঙ্ঘন হবে মোর দৃঢ় পণ,  
 জিনিবে যে মোরে, আমি বরিব তাহারে ।

সুগ্রীব ।—ভাল কথা শুনি যদি মন্দ ভাব, ধনি,  
 আর না বলিব,—কর যাহা ইচ্ছা তাই,  
 আত্মনাশে দৃঢ় পণ করেছ আপনি,  
 তাহাতে আমার কিছু প্রয়োজন নাই ।  
 মরিবে যে রোগী, তাকে মহৌষধি দিলে  
 গিলে কি সে তাহা ? আর কি কব তোমারে !  
 ভাল না করিলে, ধনি, এই কথা তুলে,—  
 পিপীড়ার পাখা উঠে মরিবার তরে !  
 থাক থাক ক্ষণকাল, দেখিবে অচিরে,  
 মৃত্যু-বিভীষিকা-সম দৈত্য-সৈন্যগণ,  
 ভাসাবে ও চারু অঙ্গ প্রতাপ রুধিরে,  
 ত্বরায় লইবে আসি তোমারে শমন ।

[প্রস্থান ।

## তৃতীয় অঙ্ক ।

প্রথম দৃশ্য ।

দৈত্য-সভা ।

শুভ, নিশুভ প্রভৃতি উপবিষ্ট ।

নিশুভ ।—রাজন্ ! কনিষ্ঠ আমি, কি কহিব আর—

কার সাধ্য আপনারে দেয় উপদেশ ;

নমিত চরণে তব এ বিশ্ব-সংসার,

ভয়ে ভীত স্বর্গে ইন্দ্র, পাতালেতে শেখ ।

ভুবন-সম্রাট্ ভ্রাতঃ, সুবিজ্ঞ আপনি,

কিন্তু এ জগতে হেন নাহি কোন জন

ভ্রমে নাহি পড়ে কভু ;—হে দানবমণি !

আপনিও পড়েছেন ভ্রমেতে এখন ।

সত্য বটে সে ললনা পরমা রূপসী,

রূপের আভাষ তার দিক্ আলোকিত,

কিন্তু বিশ্ব আলোকিছে ষাঁর কীর্তিরাশি,

তুচ্ছ-নারী-শ্রেণী পড়া তাঁর কি উচিত ?

শুভ ।—একে ত হৃদরী তাহে নবীন যৌবন,

সে রূপের অম্বরূপ নাহি ত্রিভুবনে ;

ত্রিলোকের পতি আমি ত্রিলোক-দমন,  
 শ্রেষ্ঠ যাহা স্বষ্ট তাহা আমার(ই) কারণে ।  
 এ জগতে কেবা হেন শ্রেষ্ঠতম জন,  
 এ জগতে কেবা হেন আছে ভাগ্যধর,  
 এ জগতে উপযুক্ত কেই বা এমন,  
 সে মণি বাহার গলে শোভিবে সুন্দর ?  
 ভূজঙ্গম-শিরে শোভে সমুজ্জ্বল মণি,  
 কে কোথা দেখেছে তাহা ভেক-শিরে জলে ?  
 শঙ্কর-ললাট-শোভা চাকু নিশামণি,  
 কে কোথা দেখেছে তাহা শোভে বৃষ-ভালে ?

নিশ্চয় ।—অমুজ তোমার আমি, হে দৈত্য-রাজনু !  
 আমার কি সাধ্য আমি বুঝাই তোমারে ?  
 কিঙ্ক, ভেবে দেখ দেখি স্থির করি মন,—  
 কে তুমি ? আবদ্ধ এবে কার প্রেম-ডোরে ?  
 তোমার প্রমোদ-রনে এসেছে রমণী,  
 এসেছে আশ্রুক,—পুনঃ যাক্ সে চলিয়া,—  
 তোমার উচিত কি হে সেই কথা শুনি,  
 তার রূপে যুক্ত হ(ও)য়া আপনা ভুলিয়া ?  
 এমন ঐশ্বর্য্য ভবে আছে বা কাহার ?  
 শত শত দেব-কন্যা সুরূপের ধনি,—  
 উজ্জ্বল-ররণা সবে,—কিঙ্করী তোমার,  
 সংসার-দুর্লভ-রূপা শুভ্রা দৈত্যরাণী ।  
 পরনারী কন্যাসম কর দরশন,  
 পৃথীরাজ ! রাজবর্ষ করহ পালন ।

ভক্ত ।—বৃথা বুঝা'ও না, তাই, মোরে তুমি আর,  
লভিতে সে নারী-রহে প্রতিজ্ঞা আমার ।

### সুগ্রীবের প্রবেশ ।

সম্বাদ কি, দূত ? কই, কোথা সে রমণী ?  
পিছে কি আসিছে ধনী শিবিকারোহণে ?  
আগে কি এসেছ তুমি, ওহে বীরমণি !  
মঙ্গল-সম্বাদ লয়ে আমার সদনে ?

সুগ্রীব ।—সম্বাদ মঙ্গল আর কহিব কেমনে !  
বাসনার বিপরীত ঘটেছে এখন,  
কহিনু যতনে আমি সে নারী-রতনে,  
পতিত্ব তোমারে, প্রভো ! করিতে বরণ ।  
সদর্পে কহিল তবে রমণী আমারে ;—  
সমরে জিনিতে তারে পারিবে যে জন,  
যে জন পারিবে তার দ্বর্প হরিবারে,  
পতিত্ব তারেই সেই করিবে বরণ ।  
বলিল সকল কথা কহিতে তোমারে,  
বিনা যুদ্ধে এক পদ নড়িবে না ধনী ;  
যে জন পারিবে ল'তে সবলে তাহারে,  
হয়ে হবে বামা তার চির-প্রেমাদ্বীপী ।

ভক্ত ।—আকাশ-কুসুম-ময় তোমার বচন,  
বিস্মিত হইলু শুনি রমণীর বাণী,  
মোর সহ নারী চাহে করিবারে রণ ?  
উন্মাদিনী নয় তু সে, কহ দূত, শুনি ?



সুখী ।—উন্মাদিনী কেমনে বা কহিব তাহারে,  
 স্বরূপ কহিল ধনী তার এই পণ,  
 বার বার এই কথা কহিল আমারে,  
 সদর্পে আছানি রণে তোমারে, রাজন্ !

শুভ ।—সত্য কি, হে দূত ! সত্য এই তার পণ ?  
 আমার সহিত চাহে রণ করিবারে ?  
 জানে না কি শুভ আমি শমন-দমন ?  
 জানে না কি ত্রিসংসার কাঁপে মোর ডরে ?  
 অরুণ, বরুণ, ইন্দ্র আদি দেবগণ  
 পরাজিত যে শুভের অটুট বিক্রমে ;  
 হাসি পায় শুনি এই প্রলাপ-বচন,—  
 সে শুভে রমণী আজি আছানি সংগ্রামে !  
 বাধানি তাহারে আমি, ধন্য সে ললনা !  
 গর্জিত বচন তার বীর-প্রীতিকর,  
 যা হোক, দেখিব তার সেই বীরপণা,  
 কি সাহসে চাহে ধনী করিতে সমর ।  
 বীরাজনা সে সুন্দরী হুঁটা বীর তরে,  
 বীর-যোগ্যা, বীর-ভোগ্যা সে নারীরতন ;  
 আমা সম বীর বল কে আছে সংসারে ?  
 বিধাতা গড়েছে তারে আমার(ই) কারণ ।  
 মটসেন্যে গমন কর বিজয়-সন্নিধানে,  
 কোন্ সেনাপতি এবে আছ হে এখানে ?  
 দুরার আনহ সেই রমণী-রতনে,  
 ধর্ম করি গর্জ তার ভয়ঙ্কর রণে ।

ডাকি আন, দূত, তুমি ধূম্রলোচনেরে,  
সেনাপতি-পদে আমি বরিলাম তারে ।

[সুগ্রীবের প্রস্থান ।

বিষম ক্রোধাগ্নি জ্বলি উঠে অন্তরেতে,  
শুনিল না গরবিণী আমার বচন ?  
আবার শুনিয়া হাসি নারি সঙ্গরিতে,  
কোমলাঙ্গী আমা সহ চাহে কি না রণ !

সুগ্রীব ও ধূম্রলোচনের প্রবেশ ।

ধূম্র ।—কি কারণ স্মরিয়াছ এ দাসে, রাজন ?  
কি কাজ সাধিতে হবে কহ, দৈত্যনাথ ?  
কাহারে পাঠাতে হবে শমন-সদন ?  
কবিত্তে কি হবে আজি শত ইন্দ্রপাত ?  
নির্ম্মিতে হবে কি গিরি আজি দেব-মেধে ?  
দেখাতে হবে কি যমে ঘোর যমালয় ?  
অনুমতি দেহ, প্রভো । যাইয়া অনাধে  
উপাড়িয়া সাগরেতে ফেলি হিমালয় ।  
বায়ুরে কি লৌহ সম করি দিব গুরু  
শব-পরমাণু-রাশি মিশ্রায়ে উহায় ?  
উৎপাটিতে হবে বল কার দস্ততরু ?  
কি করিতে হবে, প্রভো, আদেশ আমায় ?

শুভ ।—জানি, হে ধূম্রলোচন ! তব তেজ আমি,  
তোমার অসাধ্য কিছু নাহি ভ্রমণে ;  
অকুত-সাহস তব, বীরশ্রেষ্ঠ তুমি,

সকলি করিতে পার তুমি অবহেলে ।  
 শুন, সেনাপতি ! তুমি ত্বরিত গমনে  
 বিজ্যাচল-সন্নিধানে যাও একবার,  
 দেখিবে ভ্রমিছে তথা প্রমোদ-কাননে,  
 নবীনা যুবতী এক প্রেমের আধার ।  
 রূপ-অহঙ্কারে মত্ত কলাপিনী প্রায়,  
 গিরি-অধিত্যকা-দেশে বসি গরবিণী  
 পাঠানু সুগ্রীবে আমি আনিতে তাহায়,  
 তার পাশে এই পণ করিল সে ধনী,—  
 জিনিতে পারিবে তারে যে জন সমরে,  
 সবলে লইতে তারে পারিবে যে জন,  
 যে জন পারিবে তার দর্প হরিবারে,  
 তারেই করিবে বামা পতিত্বে বরণ ।  
 শীঘ্রগতি যাও, বীর ! তুমি বিজ্যাচলে,  
 সমরে সমর-সাধ মিটাইয়া তার,  
 ধর্ম করি গর্ভ তার নিজ ভুজবলে,  
 অবিলম্বে আন তারে নিকটে আমার ।  
 সেনাপতি-পদে তোমা বরিলাম আজ,  
 শীঘ্রগতি যাও, বীর ! বিলম্বে কি কাজ ।

যুগ্ম ।—কোথাকার সে রমণী বুঝিতে না পারি,  
 মোদের সহিত চাহে করিবারে রণ !  
 এ কথা শুনিয়া হাসি সম্বরিতে নারি,  
 হেন মতিচ্ছন্ন তার কিসের কারণ ?  
 যা হোক, এখনি তারে আনিব ধরিয়া,

রণ কি করিব আর রমণীর সনে !  
 হৃৎকান্দে গর্জি তার খর্কিত করিয়া,  
 এখনি আনিয়া দিব তোমার চরণে ।  
 চলিলাম তব আজ্ঞা করিতে পালন,  
 প্রণমি চরণে তব, হে দৈত্য-রাজন !

শুভ ।—সুগ্রীবের সহ ত্বরা করহ গমন,  
 যাও, বিলম্বেতে আর নাহি প্রয়োজন ।

[ সুগ্রীব ও ধূম্রলোচনের প্রস্থান ।

(মেগথ্যে রণবাদ্য)

দ্বিতীয় দৃশ্য ।

বিদ্যাচল—প্রমোদ-কানন ।

সুগ্রীব ও ধূম্রলোচনের প্রবেশ ।

ধূম্র ।—এই ত হে উত্তরিনু বিদ্যা-সন্নিধানে ;  
 এই ত আসিষু এবে প্রমোদকাননে ।  
 কহ, দূত ! কহ শুনি, কোথা সেই বরাননী ?  
 পলাইল বৃষ্টি মোর আগমন শুনে ?  
 কে না ডরে ধূম্রাক্ষরে এ বিশ্বভুবনে !  
 অচলে হেলাতে পারি গাত্রে রগড়ে,  
 মুষ্টিতে চূর্ণিতে পারি হিমাদ্রির চূড়ে,

যদি ছাড়ি হৃদয়, উথলয় পারাবার,  
 চিবাইতে পারি বজ্র দন্তে কড়মড়ে,  
 বিশ্ব উড়াইতে পারি নিখাসের ঝড়ে ।  
 কালান্তক যম ভীত নয়ন-ভঙ্গীতে,  
 ঘুরাই ইন্দ্রের মুণ্ড অঙ্গুলি-ইঙ্গিতে,  
 রমণীর অহঙ্কার, তেজ গর্ব দস্ত তার,  
 একাকী, স্ত্রীবি, তুমি পারিতে ভাঙ্গিতে,  
 আমারে আনিলে কেন রমণী-রঞ্জেতে ?

স্ত্রীবি ।—এই যে এখানে ছিল সেই গরবিনী,  
 কোথায় পলাল এবে তব নাম শুনি ?  
 এই ত ক্রণেক পূর্বে, কতই কহিল গর্বে,  
 ডাকিল সে দৈত্যনাথে সমরে আহ্বানি,  
 কোথায় লুকাল পুনঃ সেই মায়াবিনী ?

ধূম্র ।—না লুকায়ে কি করিবে, কি সাধ্য তাহার  
 ক্রণেক দাঁড়াতে পারে সম্মুখে আমার ?  
 যা হোক, স্ত্রীবি তুমি, দেখ ওই বনভূমি,  
 পাতি পাতি করি এবে খোঁজ চারি ধার,  
 বামারে লইয়া ভূপে দিব উপহার ।

[স্ত্রীবিবের প্রস্থান ।

(বিজয়গিরির উদ্দেশে)—

বিজয়চল ! কি ভাবিছ বিরস বদনে ?  
 আমায় দেখিয়া ভয় হয়েছে কি মনে ?  
 নয়ন-নির্বন্ধ-বারি, ঝরিতেছে ধীরে ধীরে

বাড় ভুলি কি দেখিছ ?—পলাবে কেমনে ?  
 পলায়ে বা যাবে বল, তুমি কোন্ স্থানে ?  
 হেন সাধ্য কার বল, রক্ষিবে তোমারে  
 মোর হাত হতে ? তুমি দেখাও সত্বরে  
 কোথা সেই মায়াবিনী, কোথা সেই গরবিনী,  
 এখনি বাহির করি দাও হে তাহারে,  
 নতুবা বিক্রি তোমা ভীম ভীক্ষ শরে ।  
 কোথায় লুকায়ে আছে কহ, সে রূপসী,  
 তুমারে ঢেকেছ কি হে সেই রূপরাশি ?  
 দেখ এই ভীম ভুজ, রাখিয়াছি বাণ যুজ,  
 অনর্থ ঘটবে তব যদি আমি রুষি,  
 তুমি ত প্রহরী হয়ে আছ হেথা বসি ।  
 এখনি কাটিব শৃঙ্গ খণ্ড খণ্ড করে,  
 গুঁড়া করে দিব দেহ গদার প্রহারে,  
 এড়িয়া পবন-বাণ, ও প্রকাণ্ড দেহধান,  
 ডায়ে ফেলিব আমি অতল সাগরে,—  
 এই হানিলাম বাণ, রক্ষ আপনারে ।

(শরসঙ্কান)

গিরিশিরে গৌরী ও নিম্নে স্ত্রীবেশ প্রবেশ ।

ধৃত ।—এই নাকি ? হাঁ হে দূত ! এই কি সে ধনী ?  
 বটে বটে, রূপ বটে ! ধন্য বরাননী !  
 কোথায় লুকায়েছিল, কোথা হতে পুনঃ এলো, .  
 এ দেশ করিল আলো রূপে গরবিনী ;

কোথায় লুকায়েছিল আলোক-রূপিনী ?  
 স্ত্রী ।—পাতি পাতি করিয়া যে খুঁজিলাম গিরি,  
 কোথায় লুকায়েছিল না জানি তুলসী ;  
 অনুমানি এ রমণী, হবে ঘোর মায়াবিনী,  
 ধীরে আসি দাঁড়াইল গিরি-শৃঙ্গোপরি,  
 কেমন রয়েছে দেখ ঘাড় হেঁট করি ।

ধ্রু ।—হাঁ গো বাছা শশিমুখি ! কহ দেখি শুনি,  
 কি হেতু রয়েছ হেঁট করি মুখখানি ?  
 মোর আগমন শুনে, ভয় কি হয়েছে মনে ?  
 ভয় কি ? ছুঁই না আমি অবলা রমণী,  
 ভয়াৰ্ত্ত জনেরে সদা অভয় প্রদানি ।  
 আমা বিদ্যমাণে তোমা কে ছুঁইতে পারে ?  
 দাঁড়াইয়া আছি আমি করবার-করে ।  
 হিমময় বিক্ষাচলে, কেন বা লুকায়েছিলে ?  
 বিক্ষাগিরি সাধ্য কি যে লুকায় তোমারে ?  
 এ কি লুকাবার রূপ ! দেখাও সংসারে ।  
 ভয় কি তোমার, বাছা ! এস মোর সনে,  
 সমাদরে লয়ে যাই তোমায় যতনে ;  
 দৈত্যেশ ত্রিলোকেশ্বর, হইবে তোমার বর,  
 রহিবে নির্ভয়ে তুমি শুস্তের ভবনে ;  
 ভয়ের কি সাধ্য তোমা পরশে সেখানে ?

গৌরী ।—শুনিয়ে তোমার কথা বড় হাসি পায়—

এতই কি ভয় মোর দেখিয়া তোমায় ?

দেখিতে না পারি চেয়ে, মুখ তুলে তব ভয়ে ?

কি ভয় আমার বল আছে এ ধরায় !  
 ভয়ের আবাস আমি, ডরি না কাহায় ।  
 কেনই বা লুকাইব দেখিয়া তোমাতে ?  
 লুকাবার স্থান মোর আছে কি সংসারে ?  
 যেথায় দেখিব তুমি, সেথা বিদ্যমান আমি ;  
 তোমার কথায় কেন ভেটিব শুভ্তরে ?  
 কি দায় পড়েছে মোর, কহ তা আমারে ?  
 দেখিব, হে বীরবর ! মোর তীক্ষ্ণ শর  
 ত্বরায় বিদ্ধিবে সেই শুভ্তর অন্তর ;  
 তুমি যদি রণ-আশে, এসে থাক মোর পাশে,  
 অবিলম্বে দেহ তবে আমারে সমর,  
 তোমাতে সংসার হতে করি হে অন্তর ।

ধূম্র ।—সুগ্রীব ! বলে কি বামা ? ভেরেছে কি মনে ?  
 এতই সাহস মোরে সংগ্রামে আহ্বানে ?  
 আমি দৈত্যসেনাপতি, ভয়ে কাঁপে বশুমতী,  
 মোর বীর্য কে না জানে এ বিশ্ব-ভুবনে ?  
 এতই সাহস মোরে বধিবে পরাণে ?

(গৌরীর প্রতি)—

এ হুর্কুচ্ছি বল, বাছা, কে দিল তোমাতে,  
 আমার সহিত তুমি চাহ যুঝিবারে ?  
 আমি দৈত্য-সেনাপতি, তুমি গো কোমলা অতি,  
 অঙ্গুলির বল নাহি তোমার শরীরে,  
 ধসিবে হাতের ধনুঃ এক হৃহঙ্কারে !  
 বীর নৈলে বীরবীর্য কে বুঝিতে পারে



ত্রিদিবে ত্রিদিবপতি জানে সে আমারে,  
পাতালে বাহুকি জানে, ধরায় ধরণী জানে,—  
নিয়ত যে প্রপীড়িত মোর পদভারে,  
নারী তুমি, কি জানিবে ধূলোচেনেরে ?

গৌরী ।—হাঁ, গো দৈত্যসেনাপতি । ভেবেছ কি মনে  
তোমার সমান বীর নাহি ত্রিভুবনে ?  
মূর্খের মতন কেন, আত্মদস্ত কর হেন ?  
ক্ষমতা যদিপি থাকে প্রবেশহরণে ;  
মুখেতে বড়াই শুধু করে মূর্খ জনে ।

ধূম্র ।—অবোধ বালিকা তুমি, কি বলিব আর,—  
ভাবিয়াছ যুদ্ধ বুঝি বিপিন-বিহার ?  
নহিলে এমন পণ, করিবে বা কি কারণ ?  
এখনও বলিতেছি ছাড় অহঙ্কার,  
এখনও শুন, ধনি, বচন আমার ।  
আর রক্তপাত তুমি করা'ও না মোরে,  
মিটিয়াছে সাধ মোর ওই কাজ করে,  
লোকে যেন অবশেষে, স্ত্রীস্বাতী ব'লে না ঘোষে,  
চাহি না নাশিতে মোর যশঃ এ সংসারে,  
চরমে রমণী-বধ করিয়া সমরে ।

গৌরী ।—সাধ যদি মিটিয়াছে রক্তপাত করে,  
তবে কেন এলে এট রণ-সাজ প'রে ?  
আজন্ম করিয়া পাপ, পাইতেছ মনস্তাপ,  
সে পাপের প্রায়শ্চিত্ত করিবার তরে,  
এসেছ কি নিজ রক্ত দিতে এ সমরে ?

ভাসিবে এখনি তুমি মোর অস্ত্রাঘাতে  
শালকাঠ-খণ্ড সম শোণিত-নদীতে,  
দেখিবে তখন, বীর ! বল ভব অঙ্গুলির  
আছে কি না আছে মোর লোমাঘ্রভাগেতে ;  
সেনাপতি ! বীর তুমি, বিখ্যাত জগতে ।  
মরিতে বাসনা যদি হয়েছে তোমার,  
গর অস্ত্র, বিলম্বিতে কিবা ফল আর ?  
তব প্রাণ-অর্থ্য আগে, দিয়া যমরাজ-আগে,  
পুরাব দানব-নাশ-সংকল্প আমার,  
বিনাশিয়া দৈত্যকূলে সান্ত্বিব সংসার ।

ধৃষ্ট ।—কি বলিলে ? এত সাধ্য ? বধিবে আমারে ?  
কর সাধ্য বধে মোরে এই ত্রিসংসারে ?  
পরাতবি ইন্দ্রে রণে, জয় করি ত্রিভুবনে,  
মরিতে হইবে শেষ রমণীর করে !  
অবলা রমণী তুমি বধিবে আমারে ?  
লহ অস্ত্র, বর ধনুঃ করেছে তুলিয়া,  
আর করিব না দয়া অবলা বলিয়া,  
তোমার ও দর্পচূড়া, এখনি করিব গুঁড়া,  
নাগপাশ-অস্ত্রে বাঁধি যাইব চলিয়া,  
শেষে এই দূত তোমা যাইবে লইয়া ।

শৌরী ।—(শরত্যাগ করিয়া)—

রক্ষ, সেনাপতি ! তুমি রক্ষ হে এখন—  
মোর হাত হতে রক্ষ নিজে সৈন্যগণ ।  
ত্রিদিববিজয়ী তুমি, তব ভয়ে বিশ্বভূমি

কাঁপে থরথরে, এবে কর দরশন—  
 অবলা নারীর ভূজে শক্তি কেমন ।  
 রোধিল রবির কর মোর শরজাল,  
 আর কি দেখিছ, বীর ! তাব পরকাল ।

ধৃষ্ট ।—(স্বগত)—

হায়, এই গরবিনী মহাবীৰ্য্যবতী,  
 সামান্য রমণী কভু নহে এ যুবতী,  
 চোখ চোখ তীক্ষ্ণ বাণে, আকুলিল সৈন্যগণে ;  
 ভাঙ্গিল বিকট ঠাট, হরিল শক্তি,—  
 দানব-দুর্ভাগ্য নারী-রূপে মূর্তিমতী !  
 অস্তির করিল মোরে বিষম সমরে,  
 হেন তেজ হেরি নাই অবনী মাঝারে,  
 যাহা হোক, প্রাণপণে, যুঝিব বামার সনে,  
 কালি নাহি দিব কূলে পলাইয়া ভরে,  
 সমরে মরিলে যশঃ রহিবে সংসারে ।

(প্রকাশে)—

ধন্য অস্ত্রশিক্ষা তব, ধন্য বীরাজনা !  
 বাধানি সহস্র মুখে তব বীরপণা ।  
 বিচ্ছিন্ন করিলে, ধনি, আমার এ অলৌকিনী,  
 ভাসাইলে রক্তলোতে এ বিপুল সেমা,  
 ধন্য তব অস্ত্রশিক্ষা, ধন্য বীরপণা !  
 ক্রান্ত হও, বীরাজনে ! ত্যজি সৈন্যগণে  
 আমার সহিত আসি প্রবেশহ রণে ;  
 দেখিব কোমল কর, হানিবে কতই শর,

এখনি কাটিব উহা ভীম প্রহরণে,  
এখনি পাঠাব তোমা শমন-সদনে ।

[উভয়ের মুদ্র—ধূম্রলোচনের পতন—  
সুগ্রীবের প্রস্থান ।

## চতুর্থ অঙ্ক ।

প্রথম দৃশ্য ।

অন্তঃপুরস্থ উদ্যান ।

সখীসহ শুভ্রার প্রবেশ ।

সখী ।—শুনেছ কি, ঠাকুরাণি ! তোমার ছদ্ম-রূপি  
অন্য এক রমণীর প্রেম-ফাঁদে পড়েছে,  
তোমার সতিনী এক পোড়া বিধি গড়েছে ?

শুভ্রা ।—ছি ছি, সখি ! সে কি কথা, ও কথা বল না হেথা,  
আমার ছদ্মনাথ আমার—আমার লো,  
আমা বই নারী তিনি জানেন না আর লো !

সখী ।—অবাক্ হইলুম যেনে, তোমার ও কথা শুনে,  
পুরুষে বিশ্বাস এত কর, সখি ! কেমনে ?  
পুরুষ নৃতনে বশ জান না কি, ললনে ?

ভদ্রা ।—পতি মোর বিশ্বজ্ঞেতা দৈত্যকুলমণি,  
সামান্য পুরুষ তাঁরে ভেব না, স্বজনি !

সখী ।—শোন নি কি, সুবদনে ! তোমার প্রমোদ-বনে  
এসেছে কামিনী এক সুরূপের ধনি,  
উজ্জ্বল অগ্নির জ্যোতিঃ—নবীন-যৌবনী ।

ভদ্রা ।—বনশোভা দরশনে, কামিনী প্রমোদ-বনে  
এসেছে, আশুক ; তায় তাঁহার কি কাজ ?

সখী ।—তাহাতেই মজেছেন দৈত্যপতি আজ ।

ভদ্রা ।—কে কহিল এই কথা তোমাতে, ললনে ?

সখী ।—দূত-মুখে শুনিলাম আপন প্রবণে ।

ভদ্রা ।—কোথায় বসতি তার ?—কেবা সে রমণী ?

সখী ।—কোথায় বসতি তার জানি না, স্বজনি,  
শুনিমু আবাস তার সমগ্র মেদিনী ।

ভদ্রা ।—সমগ্র মেদিনী ? সে ত পথের রমণী !

পথে পথে ফিরে, ঘুরে সমগ্র মেদিনী,  
আবাস-বিহীনা সেই সুরূপের ধনি,  
তাই রে আবাস তার সমগ্র মেদিনী ;  
তারি প্রেমে মজেছেন দৈত্য-চূড়ামণি ?  
ধিক্ রে কপাল ছার, হায়, কি কহিব আর,  
দাসীর অযোগ্যা নারী দৈত্যেশ-মোহিনী !  
হেন হীনমতি নৃপ, কখন না জানি ।

ধিক্ তাঁর অহঙ্কার, ধিক্ রে ঐশ্বর্য তাঁর,  
ধিক্ তাঁর বাহুবল, ধিক্ যশোরাশি !  
চাহেন অন্যরে, আমি থাকিতে মহিষী !

যাও, সখি ! এই ক্ষণে বিদ্যাচল-উপবনে,  
ধরে আন সে বামারে,—দেখি সে সুন্দরী  
হতে পারে কি না পারে আমার কিস্করী ।

সখী ।—গেছে সে ধূত্রলোচন আনিতে তাহারে,  
খর্ব করি গর্ব তার ভীষণ সমরে ।

শুভ্রা ।—গর্ব কি ? কিসের গর্ব সেই মহিলার ?  
পথের নারীর সনে রণ কি আবার ?

সখী ।—শোন নি কি সে রমণী, নৃপের আসক্তি শুনি,  
দূতের নিকট গর্বে করেছিল পণ,  
বরিবে তাহারে রণে জিনিবে যে জন ।  
তাই ত গিয়াছে রণে সে ধূত্রলোচন ।

শুভ্রা ।—ধিক্ যত দৈত্যগণে, ধিক্ সে ধূত্রলোচনে,  
যুঝিতে নারীর সনে করিল গমন,  
দৈত্যনামে করিল রে কলঙ্ক অর্পণ !  
ধিক্ রে দৈত্যের খ্যাতি, আজি দৈত্য-সেনাপতি,  
গিয়াছে ধরিতে অসি রমণীর রণে,  
পরাজবি ইন্দ্রে, যমে, অরুণে, বরুণে !  
ধিক্ দৈত্য-বশোরাশি, ইন্দ্রাণী বাহার দাসী,  
সেই দৈত্যপতি চাহে সামান্য নারীরে !  
বিষ ঝাওয়া(ই)য়া কেন মারে নি আমারে ?  
যা হোক, লো সহচরি, যাও এবে ত্বর করি,  
জানাও গে দৈত্যনাথে বাসনা আমার,  
ক্ষণেকের তরে চাই দরশন তাঁর ।

সখী ।—যাইতে হবে না, সতি, তোমার প্রাণের পতি

ওই আসিছেন দেখ, দেখ লো এখন—  
 বিষাদিত চিন্তাষিত হৃৎখেতে মগন ।  
 দূত ওই আসিতেছে, ভূপতির পিছে পিছে,  
 মুখেতে নাহিক কথা, সজ্জন নয়ন,—  
 হারিয়াছে রণে বুঝি সে ধূললোচন !  
 দেখ হুই সহোদর, চণ্ড মুণ্ড ধনুর্ধর,  
 আসিতেছে অধোমুখে, অতি ধীরে ধীরে,  
 না জানি কি ঘটয়াছে নারীর সমরে !  
 বিষম বিষাদে মগ্ন, দেখ সখি, চিত্ত ভগ্ন,  
 দানব-কুলের চূড়া—বিরস বদন;  
 কাজ নাই ভেটি নূপে মোদের এখন ।  
 চল, সখি, চল ঘাই দৌহে অন্তরালে,  
 বলিও সকল কথা সময় পাইলে ।

শুভ্রা ।—রাজার বিরস মুখ, দেখিয়া বিদরে বুক,  
 অতুল ঐশ্বর্য্য, হায়, হৃৎখের আবাস রে !  
 সুরভি কুম্ভে ছুট কীট করে বাস রে !  
 হেরিয়া বদন ওঁর, নিভিল ক্রোধাগ্নি মোর,  
 চল, সখি ! অন্তঃপুরে করি লো গমন,  
 কাজ নাই ভেটি নূপে মোদের এখন ।

[ উভয়ের প্রস্থান ।

শুভ, সূত্রীব, চণ্ড ও মুণ্ডের প্রবেশ ।

শুভ ।—অসম্ভব, ওরে দূত, তোর এ বচন,  
 পড়েছে নারীর রণে সে ধূললোচন !

শরে যার জর জর অমর-নিকর,  
ভয়ে যার বিকম্পিত বিখচরাচর,  
যে বীর করিল জয় বায়ু, ইন্দ্র, যমে,  
সে বীর পড়িল আজ নারীর সংগ্রামে !  
কদাপি প্রত্যয় নাহি হয় রে অন্তরে ;  
পরাজিত বুঝি বীর হয়েছে সমরে,  
তাই বুঝি লুকায়েছে অপमानে বলী,  
লজ্জায় আমায় মুখ দেখাবে না বলি !

ধূম্র ।—লুকায়েছে, হায়, প্রভো ! সে ধূম্রলোচন  
অন্ধতম কালকূপে, হে দৈত্যরাজন্ !  
আর আসিবে না কভু ভেটিতে তোমারে,  
আর দেখাবে না মুখ সংসারে কাহারে ;  
এড়াতে সংসার-জালা, রাখিয়া শরীর,  
চির-শাস্তি-নিকেতনে গিয়াছে সে বীর ।  
বিবাদ করিয়া শির দেহের সহিত  
পড়িয়া পৃথক্ হয়ে, প্রতপ্ত শোণিত  
মধ্যস্থ হয়েছে দোঁহা মিলাবার তরে,  
মিলিবার নয় যাহা নশ্বর সংসারে !

শুভ ।—বিশ্বজেতা নিপতিত রমণীর রণে !  
শুকাল অশ্রুধি-অশ্রু চাঁদের কিরণে !  
কহ, দূত ! কহ মোরে, কেমনে তা শুনি,  
খেদাইল তোমা সবে নারী একাকিনী ?  
সুগ্রীব ।—কেমনে কহিব, প্রভো ! যুঝিল কেমনে  
একাকিনী সে রমণী আমাদের সনে !



যুদ্ধকালে কে পেয়েছে দেখিতে তাহারে ?  
 মধ্যাহ্ন-মার্ভণ্ড পানে কে চাহিতে পারে ?  
 বীরতেজে, রূপতেজে, যৌবনের তেজে,  
 তেজস্বিনী সে কামিনী গভীর গরজে,  
 অনর্গল শরজালে ছাইল গগন,  
 এই মাত্র দেখিয়াছি, হে দৈত্যরাজন !  
 তেজস্বিনী সে বামার প্রচণ্ড প্রভাবে,  
 পলাইল ব্যূহ ভাঙ্গি সৈন্যগণ সবে ;  
 আর কি কহিব, দেব ! দেখ এক বার,  
 কখন যা হয় নাই হয়েছে আমার,—  
 রমণীর বাণে রক্ত বারিতেছে দেহে,  
 ত্রিদিবপতির বজ্র প্রতিহত যাহে ।

শুভ্র ।—বুঝিলাম সে রমণী শক্তির আধার ;  
 ভাল তার তেজ আমি দেখিব এ বার,  
 দেখিব কতই বল কোমল শরীরে,  
 কত বা অস্ত্রের শিক্ষা সে মুণ্ডাল-করে ।

চণ্ড ।—সাধিতে মনের সাধ, হে দানবপতি !  
 যদি হয় অভিলাষ, দেহ অনুমতি  
 আমাদের প্রতি, মোরা গিয়া এই ক্ষণে  
 বামারে আনিয়া দিব তব শ্রীচরণে ।

শুভ্র ।—তোমাদের(হঁ) কাজ ইহা, বুঝিলাম এবে,  
 যাও হুই ভাই মিলি সে ভীম আহবে,  
 সামান্য অবলা কভু নহে সে যুবতী,  
 অনিবার্য তেজ তার বিষম শক্তি ;

তোমা দৌছে বরিলাম সেনাপতি-পদে,  
সমর করিয়া জয় এস নিরাপদে ।

মুণ্ড ।—আমরা থাকিতে তব কি চিন্তা, রাজনু !  
যে হোক সে হোক বামা, দেখিব এখনি  
কতই সাহস তার কোমল পরাণে !  
বাণে বাণে উড়াইয়া প্রেরিব এখানে ।  
দেহ অনুমতি তবে, বিলম্বে কি কাজ,  
পরি গিয়া ছুই ভা(ই)য়ে সময়ের সাজ ।  
বাজুক হৃদুভি এবে ঘোর কোলাহলে,  
বেরুক সে রবে যম আগ্নে বিক্ষ্যাচলে ।

শুভ ।—এস তবে, বীরবর ! বিলম্বে কি কাজ ?  
দানব-কুলের মান রাখ দৌছে আজ ।

[চণ্ড ৩ মুণ্ডের প্রস্থান ।

শুভার প্রবেশ ।

এস, শুভে ! শুনেছ কি সব সমাচার ?  
অবলা নারীর করে দৈত্যের সংহার !

শুভা ।—শুনিমু, দানবমণি ! সকলি এখন,  
নারীহন্তে হত আজি সে হুতলোচন !  
কিন্তু ভেবে দেখ, নাথ ! এ হেন অনর্থগাত  
খেচ্ছায় করিছ তুমি, হায়, অকারণ  
একটি নারীর রূপে মজাইয়া মন ।  
হায়, হায়, মহারাজ ! এই কি উচিত কাজ ?  
ত্রিবিধ-বিজ্ঞতা তুমি ত্রিলোকের স্বামী,

একবার মনে ইহা ভাব না ক তুমি ?  
 হার, নিজ বুদ্ধিবোধে, অপমান হলে শেবে,  
 আবাস-বিহীনা সেই পথের কামিনী,  
 উপেক্ষিছে তোমারে, হে দৈত্যচূড়ামণি ?

শুভ ।—কি কহিব, দৈত্যোজ্জাণি । কি কহিব আর,  
 উপযুক্ত আমি এবে তব লাহুনার ।  
 বা হোক সে নারীগর্ভ, অবশ্য করিব ধর্ম,  
 কভু না লজ্জন হবে প্রতিজ্ঞা আমার,  
 নর এ বিপুল কুল হবে হারধার ।

শুভ্রা ।—দৈত্যপতি ! এ কুমতি কেন হে তোমার ?  
 অকারণে কেন নাশ যশ আপনার ?  
 বনশোভা করশনে, তোমার প্রমোদবনে  
 এসেছিল সে যুবতী রূপের আধার,  
 তুমি কেন তাহাতে না হইলে উদার ?  
 আপন গুরুত্ব তুমি ভুলিলে কিরূপে,  
 মত্ত হরে সে বামার অপরূপ রূপে ?  
 কেন বা ছাঁটালে সেই কাল-মাণিনীরে,  
 কি হলে কে আসিয়াছে না ভাবি অন্তরে ?  
 জান না কি, হে রাজন্ ! রিপু তব ত্রিভুবন,  
 পাতালে পন্নগ, দেব ত্রিদিব-মাকারে,—  
 সবাই সচেষ্ট সব। তব অপকারে ।

শুভ ।—অপকার !—কে করিবে কার অপকার ?

কিসে বা কে করিবে তা হেন সাধ্য কার ?  
 আমি ত্রিলোকের পতি, করে কাঁপে বহুমতী,

আমার প্রভাপে, রাজি, কাঁপে চারি দার !

কার সাধ্য দিবে হাত অনিষ্টে আমার ?

ভদ্রা ।—প্রকাশে না হোক, কিন্তু সবাই গোপনে

তোমার অনিষ্ট-চেষ্টা করে প্রাণপণে ।

জান না কি, অমরারি ! দানবের চির-অগ্নি

অদ্বিতির পৰ্ভজাত বত দেবগণে ?

ভয়ে মাত্র নত বারা তোমার চরণে ।

তুমি ত্রিলোকের পতি, আমি নারী হীনমতি,

কি সাধ্য তোমারে আমি দিই উপদেশ,

আপনি ভাবিয়া মনে দেখ না, প্রাণেশ !

মনোবেগ শান্ত করে, চল, নাথ ! অন্তঃপুরে,

চল, নাথ ! শাস্তিপ্রদ বিভ্রাম-আগারে,

কয়টি মনের কথা কহিব তোমারে ।

মিনতি আমার এই তোমার চরণে,

বিলম্ব ক'র না আর এই উপবনে ।

ভদ্র ।—চল, প্রিয়ে ! তোমা সহ বাই হে তথার,

অন্তরের শাস্তি কিন্তু হারিয়েছি, হায় !

[উভয়ের প্রস্থান ।

## দ্বিতীয় দৃশ্য ।

বিজয়াচল ।

( গৌরী উপবিষ্টা )

চণ্ড ও মুণ্ডের প্রবেশ ।

মুণ্ড ।—বসি বামা গিরি-ছায়ে উজ্জ্বল বরণে,  
কান্দম্বিনী-ক্ৰোড়ে যেন বলিছে দামিনী;  
বলিছে প্রেমের হ্যুতি রূপ-মুগ্ধ মনে,  
যৌবনে রূপসী, মরি, আরো গরবিনী ।  
উজ্জ্বল মুকুট গিরি পরিয়াছে শিরে,  
হারায় উষার হ্যুতি উদয়-শিখরে ।

চণ্ড ।—আপন মনেতে বসি, রঞ্জে বিনোদিনী  
কত রঙ্গ করিতেছে—স্বভাব চঞ্চল—  
বিস্তারিছে কেশপাশ, এলাইছে বেণী  
নাচিছে লহরে যেন শৈবালের দল ।  
আবার বাঁধিছে বেণী পরম যতনে,  
প্রত্যেক গ্রন্থিতে, মরি, বাঁধিছে চঞ্চলা,  
বিমুগ্ধ অন্তর মম ! কুণ্ডল অবণে  
ঝুলি পরি পুনঃ পুনঃ করিতেছে খেলা,  
কটিন আঁটিছে বামা, কসিছে কাঁচলী,  
ব্যস্ত ধনী বীথ দিতে যৌবনের স্রোতে ;  
মুচাক অঙ্গুলি ঝলি—চম্পকের কলি—  
মুক্তা-দণ্ডে কাটিতেছে আপন মনেতে ।

মুণ্ড ।—সার্থক জনম তব, ওহে বিজ্ঞাগিরি,  
 মহাযোগী ! যোগফল পেয়েছ এখন,  
 কত জন্ম পুণ্যফলে, বলিতে না পারি,  
 হেন রূপরাশি শিরে করেছ ধারণ ।  
 দেখ, চণ্ড ! দেখ, ভাই ! দেখ একবার,  
 বিজ্ঞাগিরি-শিখরেতে মানস-তপন !  
 রূপেতেজে আলোকিত হের চারি ধার,  
 সার্থক হইল আজি যুগল নয়ন !

চণ্ড ।—দেখাতে কিছুই আর হবে না আমারে,  
 সকলি দেখেছি আমি, চল ঘাই তবে,  
 কাছে গিয়া ভাল ক'রে দেখি গে উহারে,  
 ভেটি গে বামারে এবে ভীষণ আহবে ।

(নিকটস্থ হইয়া গৌরীর প্রতি)—

একাকিনী কেন, ধনি ! বসিয়া বিজনে ?  
 রূপের ভাণ্ডার বুঝি লুঠি বিধাতার  
 পলারে এসেছ তুমি লুকাতে এখানে,  
 বিশ্ব চরাচর, হার, করিয়া আধার ?  
 সংসারের কোন শোভা নহে মনোনীত,  
 তাই বুঝি হেঁটমুখে রয়েছ হেথায় ?  
 তোল দেখি মুখ, দেখি দেখি বেলা কত ?  
 উছক ভাস্কর, ধনি, ও মুখ-প্রভায় !

মুণ্ড ।—কি রূপসি ! রূপরাশি পর্বত-শিখরে  
 ঢালিয়াছ কেন ? ধনি ! কহ না বচন ;  
 উচ্চদেশে রেখেছ কি দেখাতে সংসারে ?

লুকাইয়াছিলে তবে কহ কি কারণ ?  
 একমনে কি ভাবিছ ?—রূপ আগনার ?  
 রূপ-সাগরের ঢেউ গলিছ কি বসি ?  
 সুধাপাত্র হাতে করি কেন বৃথা আর ?  
 পান কর যত পার ওই সুধারানি ।  
 রূপ-ঘোবনের সুধা বৃথা কি শরীরে  
 অনাড় হইয়া, ধনি, হবে চিরকাল ?  
 এস মোর সাথে, আমি পুলকে তোমারে  
 ভাসাই সুধাকি-নীরে তুলি প্রেম-পাল ।  
 চল লয়ে যাই প্রেম-আক্ৰীড় উদ্যানে,  
 খেলিবে তথায় প্রেম-পুলকিত মনে ।

গৌরী ।—( স্বগত )—

এ হেন তেজস্বী রূপ দেখি নে কখন,  
 দিতি-হৃদ-আকাশের প্রভাকরহর !  
 এ হেন প্রভাব বিনা কেন দেবগণ  
 মানিবে দৈত্যের কাছে চির-পরাজয় !

( প্রকাশ্যে )—

বীরবর ! কহ মোরে লইবে কেমনে  
 প্রেম-আক্ৰীড় উদ্যানে ? বনামি যে আমি,  
 নিমেষে পুড়িবে সব, গশিব বেখানেন ;  
 কেমনে তথায় মোরে লয়ে যাবে তুমি ?  
 শুনিয়া থাকিবে দৌড়ে আমার যে গণ ;  
 এসে যদি থাক হেথা হুঁত্বার তবে,  
 ধর অস্ত্র,—বিলম্বেরে নাহি প্রয়োজন,

যুগ্মলোচনের লগ্ন অনুসারিকারে ।  
কালের হয়েছে কাল, বিলম্বে কি কাজ !  
ধর ধমুধর দৌছে ধমুক দৌহার,  
গণ উদ্ধাপাত মোর বাণধাতে আজ,  
ও বীর-শরীরে ধরি কুধিরের ধার ।

চণ্ড ।—ভাল, রসবতি ! ভাল বলিলে এখন,  
সত্য, এত অন্ত্রপাত গণিব কেমনে !  
হানিতেছ বুকে শেল সদর্পে যখন,  
অন্তর জর্জর করি কটাক্ষের বাণে ।  
আবার ধরিলে ধমু ? সম্বর, অন্দরি !  
সম্বর অরির বাণ ;—এড় যত সাধ  
লৌহময় বাণরাশি,—তাহে নাহি ডরি,  
নয়ন-বাণেতে তব ভাবি পরমাদ !

গৌরী ।—লৌহময় বাণ তবে সম্বর, ধমুক !  
কালের আঘাত হতে রক্ত আপনারে,  
ধর ধর ধমুঃশর, তুল বীর-ভুজ,  
নিবার বদ্যপি পার মোর তীর শরে ।

( শরত্যাগ )

যুগ্ম ।—মরি, বিধুমুখি ! ওই শরটি হানিতে  
ছেঁড়ে নি ত নড়া ? আহা ! লাগে নি ত হাতে ?

গৌরী ।—বৃথার কথাই আর নাহি প্রয়োজন,  
কার্য্যেতে প্রকাশ কর বীরত্ব আপন ।

চণ্ড ।—অদ্বৈত-শক্তি বামা মহা-বীৰ্য্যবতী,  
কাল-মরীচিকা সম হেরি এ যুবতী ।



মুণ্ড ।—কি চিন্তা তাহাতে, ভাই ! দেখে দাঁড়াইয়া,  
ধরি আমি ধনু, দেখে এ মরীচিকার  
কত দূর বাণ মোর বাধে তাড়াইয়া ;  
শেষে শোণিতের সরঃ করিব উছার ।

চণ্ড ।—ধাক, ভাই ! তুমি, আমি যুঝি ওর সনে—  
কালের কুটিল গতি কি জানি কি হয়,  
কোমল যুগল বাঁধে প্রমত্ত বারণে,—  
এ ভীমা নারীর রণে হয় না প্রত্যয় ।

মুণ্ড ।—কে বা পারে ফিরাইতে অদৃষ্টের গতি ?  
নিবারি আমার রণে কেন তবে, ভাই !  
কলঙ্কিছ বীরধর্ম—হয়ে হীনমতি ?  
ধরিয়াছি ধনু যবে, কোন ভয় নাই ।

চণ্ড ।—বীর-ধর্ম নহে সত্য নিবারিতে রণে,  
তথাপি না বোঝে, ভাই ! অবোধ ছদ্ময় ;  
যাও তবে, সাবধানে যুঝি ওর সনে,  
খোর মায়াবিনী বামা কহিলু নিশ্চয় ।

মুণ্ড ।—ধাম, তেজস্বিনি ! রখা যুঝিয়া কি ফল ?  
ধামে না যে হাত তব বাণ বরিষণে ?  
এস দেখি একবার, দেখি কত বল,  
কতই দৃঢ়তা তব অবলা-পরানে ।  
তুমি একাকিনী, এস, আমিও একাকী  
যুঝি তব সাথে, দেখি ক্ষমতা কেমন,  
ভাই মোর দেখিবেস রণ দূরে থাকি,  
অস্ত্র কেহ না ধরিলে কোন প্রহরণ ।

গৌরী ।—ধরক সকলে অস্ত্র আজি এ সময়ে,  
কিন্হা তুমি একা যুদ্ধ,—সকলি সমান,  
ধরিতে হইল অস্ত্র যখন আমারে !  
এস তবে, দেখি তুমি কত বীর্যবান্ ।

( উভয়ের যুদ্ধ )

চণ্ড ।—( স্বগত )—

ধন্য বরাননি ! ধন্য, ধন্য বীরাজনে !  
ধন্য সেই লোক, যথা এ নারী নিবসে !  
ধন্য সেই জন, যারে প্রেম-আলিঙ্গনে  
তুষিবে এ সুহাসিনী মধুর সন্তাষে !  
আমাদের(ও) ধন্য বলি—ধন্য রে নয়ন !  
হেরিনু আজি রে হেন নারী বীর্যবতী !  
ধিকার মোদের পুনঃ, উদ্যত যখন  
নিবাইতে মোরা এই জগতের জ্যোতিঃ ।

( ভগবতীর নিরস্ত্র হইয়া অধোমুখে স্থিতি )

যুগু ।—একি ধনি ! কথা কেন নাহিক বদনে ?  
আকুলনয়নে কেন চাহিতেছ, ধনি ?  
মৃত্যুর কি পদশব্দ পশিছে শ্রবণে ?  
সঘনে বহিছে শ্বাস কেন, বিনোদিনি ?  
এখনও কি মিটে নাই যুদ্ধের পিরাস ?  
স্বৈরসিক কেন দেখি ও চল্লবদন ?  
ভাল ভাল, মিটেছে ত সময়ের আশ ।  
কোথা, ধনি, চাক-ভুজ জীম প্রহরণ ?

কাঁপিতেছ,—নিরি জোন্না ধরিছে বডনে,  
 তাই কি নিরিরে অসি দি(রা)ছ পুরস্কার ?  
 তুণের যে বাণ বেধি রহিয়াছে তুণে ।  
 ধরেছ কি জয়ধ্বজ নিজে আপনার ?  
 যুদ্ধ কি যুদ্ধের কথা, ছেলে-খেলা, ধনি ?  
 একি তুমি পাইয়াছ ধূললোচনের  
 হেলায় বধিবে তাই ?—ভাল, বিনোদিনি !  
 ভাল পণ করেছিলে গরবের ভরে !  
 সে গর্ব কোথায়, ধনি ! সে পণ কোথায় ?  
 চল তবে দৈত্যপতি-নিকটে এখন ।  
 বুধায় ভাবিলে আর কি হবে উপায়,  
 “ভাবিতে উচিত ছিল প্রতিজ্ঞা যখন ।”

গৌরী ।—( স্বগত )—

কি করি উপায় এই ভীষণ সমরে !  
 নিবারিতে নারি দৈত্য-পরাক্রম ঘোর ;  
 না পারিষু দেব-বান্ধা বুঝি পূর্ব্বিবারে,  
 পুরিল যেদিনী বুঝি অগম্যে মোর !  
 অরি এবে দেবদলে এ বিপদকালে,  
 একাকিনী না পারিব দানবে নাশিতে ;  
 সহায় আমার তাঁরা হ'ন স্বেচ্ছলে,  
 আর ত পারি না, হায়, শোণিতে ভাসিতে !

(সঙ্কলা অন্তর্ধান)

যুগ ।—কোথা গেল বামা ! এই এখানে বে ছিল !

মায়াবিনী সত্য বুঝি হবে এ ভাষিনী,

না হলে নিমেষমধ্যে কোথা লুকাইল—  
 স্বচ্ছ দিবাভাগে ?—নহে তামসী বামিনী !  
 কি বলিব ফুপে, যবে সুদীর্ঘম মোরে,  
 “কি ফল লাভিলা করি রণ-আড়ম্বর ?”  
 কেমনে বলিব আমি হারিয়েছি তারে,  
 চোখে ধুলি দিয়ে বামা হয়েছে অস্তর ।  
 হাসিবে সে দৈত্যকুল, হাসিবে মেদিনী,  
 হাসিবে অমরগণ এ বারতা শুনি ।

(ইতস্ততঃ অবেষণ)

চণ্ড।—এ কি !

সহসা পুরিল দিক্ ভীষণ আরাবে,  
 ভাঙ্গিতেছে বৃক্ষশাখা মড় মড় মড়ে !  
 সমাকুল গিরি ঘোর স্বন্ স্বন্ রবে,  
 সংসার পড়িছে ভাঙ্গি প্রলয়ের ঝড়ে !

দেবগণের সহিত গৌরীর পুনঃপ্রবেশ ।

মুণ্ড।—এ কি ! এ কি ! দেখ, ভাই, এ কি অসম্ভব !

দেখ এবে বামা ভীমা ঘোর তেজস্বিনী !  
 ভ্রুকুটী-কুটিল মুখে ভয়ঙ্কর রব,  
 হহকারে কাঁপাইছে দৈত্য-মনীকিনী ;  
 ধপ্ ধপ্ দীপিতেছে ললাটিকা ভালে,  
 ধক্ ধক্ ধকিতেছে ক্রোধাগ্নি লোচনে,  
 পোড়াইছে বিশ্ব বেন ঘোর কালানলে,  
 তেজস্বিনী মহামায়া প্রবেশিল রণে ।

প্রবেশিল বামা, ভীমা-মুরতি ধরিয়া,  
 পদতরে টলমল করি বিজ্যাচলে,  
 কাঁপিল—কাঁপিল, হায়, আমার(ও) এ হিরা  
 ধরেছি ইন্দের বজ্র বাহে অবহেলে ।

ও কে ?—সঙ্গে কে ও ? ইন্দ্র, বরুণ, পবন,  
 যম, অগ্নি আদি যত অমর-নিকর !

বুঝিলাম মায়াবিনী-রূপেতে এখন  
 এসেছে পার্শ্বভী আজি করিতে সমর ।

ধিক্ রে নির্লজ্জ ইন্দ্র ! ধিক্ দেবগণ !

এসেছ সমরে ধরি রমণী-অঞ্চল ?

লজ্জা কি হল না মনে দেখাতে বদন,

সাজিতে সমর-সাজে সহ দেবদল ?

এ গ্রহ কেন, হে ইন্দ্র ! ভেবেছ কি চিতে ?

হাতে কি ও, দেখি দেখি, আছে আছে জানি,

তোমার সে জীর্ণ বজ্র বহু দিন হতে ;

ও কেন ? উহা ত ভূমি দেখিয়াছ হানি ?

দেখ, তাই চণ্ড ! রণে এসেছে বাসব,

এসেছে অরুণ, যম, বরুণ, পবন !

ভাগ্যে-এসেছিল গৌরী, তাইত এ সব

লজ্জাহীন দেবে রণে দেখিছ এখন ।

চণ্ড !—দেখেছি সকলি, তাই, কি বলিব আর !

মারার মারার আজি পড়িয়াছি মোরা ;

কোমল-মুরতি দেখ বীর্যের আধার,

হাস্যময়ী যথ-খোজা ভীমা ভবভরা ।

মুণ্ড ।—ভীষণতা মিশিয়াছে সৌন্দর্যের সহ,  
গর্জছে সুবর্ণরূপা কাল ভুজঙ্গিনী ;—  
যা হোক তা হোক, ভাই ! অনুমতি দেহ,  
খর্ব্বি পার্শ্বতীর গর্ভ সমরে এখনি ।

চণ্ড ।—চল যাই যুঝি মোরা মিলি দুই জনে,  
ভাই রে ! সাহস মনে হয় না আমার,  
পাঠাতে তোমারে একা রুদ্রাণীর রণে,  
অমর তেত্রিশ কোটি সহায় বাহার ।  
উভয়ে ধরিয়া ধনু বর্ষি শরজাল ;  
তিষ্ঠিতে নারিবে রণে কেহ ক্ষণকাল ।

মুণ্ড ।—আমার সহিত রণ হতেছে গৌরীর,  
তুমি কেন তাহে হাত দিবে, দৈত্যবর ?  
দৈত্যকুল নহে কভু নিস্তেজ-শরীর,  
এখন(ও) সমরে মুণ্ড হয় নি কাতর ।  
তোমার সাহায্য, বল, লব কি কারণ,  
কালি দিতে সুনির্ম্মল দানবের কুলে ?  
কলঙ্কিলা দেবনাম শঙ্করী যেমন,  
একাকী যুঝিব বলি ডাকি দেবদলে !  
থাকুক বা থাক্ প্রাণ, কি চিন্তা তাহার !  
দেখ আগে মোর বল, যুঝ তুমি পরে,  
রণ-ক্ষেত্রে গাড়ি ওই ত্রিশূল তোমার,  
নীরব-হইয়া দেখ কি হয় সমরে ।  
এস তবে, সতি !

দেখি সমরে এখন

ভীষণ মূর্তির বল কতই ভীষণ !

[যুদ্ধে পরাস্ত হইয়া দেবগণের প্রস্থান ।

পলাও, হে দেবগণ ! পলাও এখন ;

তোমাদের কাজ নয় করিবারে রণ ।

ক্লান্ত হইয়াছ, সতি ! ছাড়িহু তোমায়,

কর গে বিক্রাম-লাভ বাসনা যথায় ।

[ প্রস্থান ।

গৌরী।—( স্বগত )—

কি আশ্চর্য্য ! হেন বীর্য্য দেখি নি কখন !

অদ্ভুত শক্তিবান্ হেরি দৈত্যাবরে,

উগ্রচণ্ডা শক্তি মোর তর্কিল এখন,

দেবগণ কে কোথায় পলাইল ডরে !

রজনী আগতা,—এবে অস্তুরের বল

শত গুণে বৃদ্ধি হবে ; নিশার সমরে

যুগের নিধন-আশা হ্রাশা কেবল ;

না জানি কি হবে,—ভেবে পাই না অন্তরে ।

সাহসে করিয়া ভর, যদি নিশাকালে

না ছাড়ি সমর-ক্ষেত্র, উদিলে ভাস্কর

অবশ্য পড়িবে দৈত্য দেব-শরজালে

অবিশ্রান্ত রণশ্রান্তে হইয়া কাতর ।

কিন্তু যদি ছাড়ি রণ, নিশার বিরামে

নব বাগ-ভরে যথা রবি দেখা দিবে,

দেখা দিবে দৈত্য নব প্রচণ্ড বিক্রমে ;—  
কি করি,—এখন তবে ডাকি সব দেবে ।

( প্রকাশ্য )—

এস, ইন্দ্র ! পলা'ও না ছাড়ি রণ-ভূমি,  
অমর-ঈশ্বর তুমি অমর আবার !  
বরহস্তা, জম্বুভেদী, বজ্রধর তুমি,  
রণ-ক্ষেত্র ছাড়া কি হে উচিত তোমার ?  
এস, অগ্নি সর্ষভূক ! প্রভঞ্জন বায়ু !  
এস, পাশধারী পানী ! কৃতাস্ত শমন !  
ত্বরায় হইবে শেষ দানবের আয়ু,  
পলাও না রণ-ক্ষেত্র ত্যজিয়া এখন ।  
এস সবে পুনঃ মিলি এই নিশারণে,  
যজ্ঞবান্ হই সবে দৈত্যের বিনাশে,  
দেখ দৈত্য মরে কি না দেব-প্রহরণে,  
প্লাবনের মুখে শিলা ভাসে কি না ভাসে !

দেবগণের পুনঃপ্রবেশ ।

দেখ শশী পাণ্ডুবর্ণ লাজে স্ত্রিয়মাণ,  
দিও না বিশ্রাম আর লভিতে দমুজে,  
এখনি হইবে এই নিশা অবসান,  
ধর ত্বর ধনুর্বাণ দৃঢ় করি ভুজে ।  
যদি ছাড়ি রণ-ক্ষেত্র, নিশার বিরামে  
নব রাগ-ভরে যথা রবি দেখা দিবে



দেখা দিবে দৈত্য নব প্রচণ্ড বিক্রমে ;  
আঁটিতে নারিবে দৈত্যে দিবার আহবে ।

( সকলের মুণ্ডকে আক্রমণ )

মুণ্ড ।—আবার—আবার এলে জালাতে এখন,  
এস তবে, পুরাইব সমরের আশ ;  
রণরঞ্জে বিরত কি দানব কখন,  
নিদ্রায় অসির সহ করে যারা বাস ?

( দেবগণের এককালীন যুদ্ধ ; মুণ্ডের পতন )

মুণ্ড ।—(গৌরীর প্রতি)—

হানিলে ভীষণ শেল হৃদয়ে আমার,  
ভাঙ্গিলে হৃদয়, দেবি ! বিষম প্রহারে,  
সংসারে অভুল কীর্তি রহিল তোমার,  
বিনাশ করিয়া শৈবে অন্মায় সমরে ।

(মৃত্যু)

চণ্ড ।—পড়িলে—পড়িলে, ভাই, অন্যায় সমরে !

অমর তেত্রিশ কোটি মিলি এককালে,  
রুদ্রাণীসহায়ে আজি বধিল তোমারে,—  
নিপাল বীরত্ব-দীপ, হার রে, অকালে !  
উঠ, ভাই ! উঠে কথা কও একবার,  
ভরসা আমার তুমি সংসার-সাগরে,  
উঠ, ভাই ! উঠে এস হৃদয়ে আমার,  
ভাসিছে ও বীর-অঙ্গ রুধিরের ধারে !  
মাতৃগর্ভে, মুণ্ড ! তোরে দিয়াছি নু স্থান,  
শুয়েছিল দই জনে এক মাতাকোলে,

তুই জনে করেছিষু এক স্তন পান,  
 এখন ত্যজিয়া মোরে কোথা পলাইলে !  
 উঠ, ভাই ! কাজ নাই আর এ সমরে,  
 ধরাসনে পড়ে কেন মুদিয়া নয়ন !  
 অভিমান করেছ কি আমার উপরে,  
 হেরিবে না মুখ মোর করেছ কি পণ !  
 কোথা সে মধুর হাসি ও চাঁদ-বদনে,  
 কেন আজি হেরি তব বদন বিরস,  
 কাতর কি হইয়াছ চণ্ডিকার রণে ?  
 উঠ, ভাই ! জানি তব অটুট সাহস ।  
 হে চণ্ডিকে ! আদ্যাশক্তি তুমি, গো জননি !  
 এই কি শক্তির কাজ করিলে এখন ?  
 বলেছিলে যুঝিবে যে তুমি একাকিনী,  
 কেমনে ভুলিলে তুমি আপনার পণ ?  
 এই কি শক্তির কাজ করিলে প্রকাশ ?  
 অমর তেত্রিশ কোটি যুটি এককালে,  
 সোদরে অস্ত্রায় রণে করিলে বিনাশ !  
 এই বশঃ রাখিলে গো অবনীমণ্ডলে !  
 কি আর বলিব আমি, শঙ্করি ! তোমারে,  
 বুঝিলাম অতি নীচ ষত দেবগণ,—  
 নাশিলে ভাতায় মোর অস্ত্রায় সমরে,—  
 নীচের সহিত আর করিব না রণ ।  
 নির্ভয়ে বিদর হিয়া তীক্ষ্ণ শরজালে,

করিয়াছ বাহা তুমি ভ্রাতৃ-শোক-শেলে ;  
 না চেষ্টিব রক্ষিবারে আর আপনায় !  
 হান বক্ষে শেল, দেবি ! বিলম্বে কি ফল ?  
 ডুবাও আমারে ত্বর শোণিত-সাগরে,  
 নিৰ্ব্বাপিত হোক মোর শোকের অনল,  
 আর মুখ দেখাব না সংসারে কাহারে !

গৌরী ।—( স্বগত )—

কি কুকৰ্ম্ম করিলাম ! কেন অকারণে  
 ধরিলাম অস্ত্র আজি দৈত্যের সংহারে !  
 ফেলিলাম অন্ধকূপে বীরত্ব-রতনে !  
 বধিলাম দৈত্যবরে অগ্রায় সমরে !  
 ভাঙ্গিছু সাহস-ধ্বজা ঘোর যুদ্ধ-ঝড়ে,  
 বিমল বীরত্বালোক নিবানু এখন !  
 হায়, এই ভয়ঙ্কর রণ-আড়ম্বরে  
 করিছু আপন নামে কলঙ্ক অর্পণ !  
 কাজ নাই রণে, যাই কৈলাসেতে ফিরি,  
 যা হয় দেবের ভাণ্ডে হউক এখন,  
 চণ্ডের এ ভাব আর দেখিতে না পারি,  
 উদাস-মূর্তি ঘোর নৈরাশ্রে মগন !

ইন্দ্র ।—( স্বগত )—

সৰ্ব্বনাশ হল ! বুঝি চণ্ডের কথায়  
 করুণা উদিল মনে করুণাময়ীর !  
 দৈত্য-বিনাশের তবে কি হবে উপায়,

চণ্ড ।—(সক্ৰোধে)—

কি ভাবিছ, ভগবতি ! বিনত বদনে ?  
শ্রান্তি নিবারিছ কি গো দাঁড়ায়ে নীরবে ?  
ধর অসি শীঘ্রগতি,—ভেবো না ক মনে  
সহজে ছাড়িব আমি তোমারে আহবে ।  
ভাত-শোকানলে দগ্ধ করিলে আমার,  
নিবারি মনের ক্ষোভ শাস্তিয়া তোমায় ।

(চণ্ডের পদাঘাতে গৌরীর মূচ্ছা)

(গৌরী-দেহ রক্ষার্থে ইন্দ্রের বজ্রত্যাগ)

চণ্ড ।—(বাম হস্তে বজ্র ধরিয়া ভূমে নিক্ষেপ করিয়া)—

ক্ষান্ত হও, ইন্দ্র ! তুমি জাণায়ো না আর,  
তোমা সহ আমি নাহি চাহি বুঝিবারে ;  
ভেবো না ক,—কোন ভয় নাহি চণ্ডিকার,  
মর্ছিতাবস্থায় আমি স্পর্শিব না গুঁরে ।  
দানবের রণধন্য প্রাণাপেক্ষা প্রিয়,  
না প্রহারি অস্ত্র মোরা অচেতন জনে,  
অমরের মত মোরা নহি কভু হেয়,  
বলি বাহা, করি তাহা মোরা প্রাণপণে ।

গৌরী ।—(মূচ্ছাভঙ্গে সবেগে উঠিয়া)—

আর করিব না দয়া, নারকী ! তোমারে,  
যাও রে ত্বরায় এবে শমন-আগারে ।

(অসি উত্তোলন)

চণ্ড ।—(গৌরীর হস্ত ধরিয়া)—

কিছু, দেবি ! তা বলে কি দিব গো তোমারে  
 লইতে আমার প্রাণ ছিন্ন করি শির ?  
 অপমান করিবে গো এ বীর-শরীরে ?  
 বিদর এ বন্ধ, দেবি ! তীক্ষ্ণ শেল হানি,  
 কিস্বা এড় অগ্র অস্ত্র—অভিরুচি যাহে ;—  
 ছাড়িলাম হাত, শেল হান, গো রুদ্রাণি !  
 শ্রীভ্রষ্ট করিতে কভু দিব না এ দেহে ।

গৌরী ।—বধিব তোমারে আমি করিয়াছি পণ,  
 যাহে অভিরুচি, তুমি মর তবে তাহে,  
 আসন্ন-কালের বাহ্নী পূরাও এখন,  
 যাও তবে, বীরবর ! চিরশান্তি-গৃহে ।

( ভগবতীর শেল-প্রহার ; চণ্ডের পতন )



## পঞ্চম অঙ্ক ।

প্রথম দৃশ্য ।

দৈত্য-সভা ।

(শুভ্র, নিশুভ্র, রক্তবীজ ও এক পার্শ্বে স্ত্রীবি আমীন)

শুভ্র ।—শঙ্করীর এত ছল ! ক্রোধে পুড়ে দেহ !

বীরধর্ম্মে কালি তিনি দিলেন কেমনে ?

ঘুচিল এখন মোর সকল সন্দেহ,

না হলে কি পড়ে ধূল, চণ্ড, যুগু রণে !

শঙ্করীর এত ছল ! ধিক্ শঙ্করীরে !

চাহি না শুনিতে আর ও রণ-বারতা,

এখনি চণ্ডীর দস্ত খণ্ডিব সমরে,

রোষেন রুষুন হর দৈত্যকুল-ত্রাতা ।

শঙ্করীর এত ছল ! এত কুটিলতা !

শৈবদলে বিনাশিতে এত সাধ তাঁর !

ছিঁড়িলেন নিজে তিনি তাঁর স্নেহলতা,

ইষ্টদেব-পত্নী বলে ক্ষমিব না আর ।

শঙ্করীর এত ছল ! লয়ে দেবগণে

এসেছেন দেখাইতে দানবনিকরে

দানব-দলন-শক্তি ? চল যাই রণে,

ভাসাই গে রক্তস্রোতে দেবী চণ্ডিকারে ।

শঙ্করীর এত ছল ! অন্মায় সমরে  
 ক্ষুদ্র ক্ষুদ্র দৈত্যগণে করিয়া বিনাশ,  
 বেড়েছে এতই তাঁর সাহস অন্তরে !  
 নাহি কি অমর-প্রাণে আর সেই ত্রাস !  
 শঙ্করীর এত ছল ! সহে না ক আর !  
 সাজা রে বিমান তুরা,—যাইব সমরে,  
 বিচ্ছিন্নিব রণ-ঝড়ে বীরত্ব উমার,  
 ডুবাব অমরে পুনঃ ত্রাসের সাগরে ।  
 শঙ্করীর এত ছল ! যাইব আপনি,  
 আপনি যাইব রণে দণ্ডিতে গৌরীরে,  
 দেখিব কতই বল ধরেন রুদ্রাণী,  
 সাজ, হে বীরেন্দ্রবৃন্দ, পশিতে সমরে ।

নিশুভ ।—শূরেশ ! অগ্রজ তুমি, বসি সিংহাসনে  
 আজ্ঞা দিবে প্রিয়ানুজে সাধ সাধিবারে,  
 বিরাম লভিবে সদা আমা বিদ্যমানে ;—  
 আমরা থাকিতে তুমি যাইবে সমরে ?  
 আজ্ঞা দেহ, দৈত্যনাথ ! ধরি করবার—  
 দেবগর্ভখর্ব্বকারী, তীক্ষ্ণতর শরে  
 কাটি বিক্ষাচলে, মায়া ঘুচাই মায়ার,  
 ডুবাই অমর-আশা ত্রাসের সাগরে ।  
 এখন(ও) নিশুভ-দেহে রয়েছে জীবন,  
 এখন(ও) নিশুভ-বীৰ্য্য আছে সমতেজে,  
 এখন(ও) নিশুভ-বাহু হয় নি ছেদন,  
 এখন(ও) ধরিতে পারি প্রহরণ ভুজে ।

তোমার দক্ষিণ বাহ—আমি বিদ্যমান,  
বিপদ-সাগরে তব সহায় ভরসা,  
কে আছে জগতে, ভাই ! সোদর-সমান  
সুখে সুখী, দুঃখে দুঃখী, নিরাশায় আশা ?

শুভ ।—সুধাধার বরষিলে শ্রবণযুগলে,  
জানি, রে নিশুভ ! তুই আমার ভরসা,  
সোদর-সমান কেবা আছে ভ্রমণ্ডলে,  
সুখে সুখী, দুঃখে দুঃখী, নিরাশায় আশা !  
কিছু, ভাই ! মন বাঁধা স্নেহের নিগড়ে,  
চাহে না অবোধ মন পাঠাতে তোমারে  
ভয়ঙ্কর সেই কাল-প্রলয়ের ঝড়ে—  
বিশ্বমাতা চণ্ডী যথা নায়িকা সমরে ।

নিশুভ ।—চণ্ডী ৭১ সমরে, তাহে দৈত্যের কি ডর ?  
শত চণ্ডী সমবেত হোক রণশূলে,  
সহস্র তেত্রিশ কোটি আশুক অমর,  
তথাপি করিব জয় রণ অবহেলে ।  
রণচণ্ডী চণ্ড-মুণ্ডে অন্যায় সমরে  
করেছে বিনাশ লয়ে অগণিত দেবে ;  
শাস্তিব এখনি পাপ অমরনিকরে,  
খণ্ডিব চণ্ডীর দন্ত প্রচণ্ড আহবে ।

রক্ত ।—রক্তবীজ উপস্থিত, আজ্ঞা দেহ তারে  
রক্তবীজ বপিবারে সেই রণভূমে ;  
মাধার আঘাত সদা হস্ত রক্ষা করে,—  
আমরা থাকিহে, দেব । আপনি সংগাম—



দানবকুলের শিরঃ ? হবে কি ভাঙ্গিতে,  
চণ্ডিকার রণতৃষ্ণা স্বেদে আপনার ?  
ত্রিলোক-বিজেতা তুমি রমণী-রঞ্জেতে ?  
হাসিবে যে স্বর্গ মর্ত্য, হাসিবে সংসার !

নিশুভ ।—আজ্ঞা দেহ, দৈত্যনাথ ! লয়ে রক্তবীজে,  
ভাসাই গে রক্তশ্রোতে অমর-নিকরে ;  
আজ্ঞা দেহ সাজি দৌহে সমরের সাজে,  
যাই পার্শ্বতীর গর্ভ খন্নিতে সমরে ।

শুভ ।—দেখ, ভাই ! মায়াজাল পাতি মহামায়া  
নাশিতে উদ্যত আজি দানবনিকরে,  
শৈবকুল-বিনাশিনী হল শিবজায়া !  
ক্লেভ, রোষ, অভিমান ধরে না অন্তরে !  
দেখিব চরম তবু, কিসে কিবা হয়,  
দেখিব অমরগণে, দেখিব গৌরীরে,  
সাহস-পতাকা দৈত্য ভীকু কভু নয়,  
আনন্দে সমরে প্রাণ বিসর্জিতে পারে ।  
তোমাদের কথামতে দমিনু এখন  
হৃদম সমরলিপ্সা,—ক্রোধের উচ্ছ্বাস ;  
কর, রক্তবীজ ! তবে সমরে গমন,  
নিশুভের সহ কর গৌরী-গর্ভ নাশ ।  
রাখ দৈত্যকুলমান এ ঘোর বিপদে,  
তোমা দৌহে বরিলাম সেনাপতিপদে ।

রক্ত ।—বৃথা গর্ভ করি রণে যাব না, রাজন !  
স্বার্থহীন পলায়ন হবে বীরত্ব যেমন ।

ভক্ত ।—বাও তবে, বিলম্বিতে নাহি প্রয়োজন ।

[সকলের প্রস্থান ।

## দ্বিতীয় দৃশ্য ।

বিক্র্যাচল—রণক্ষেত্র ।

( গৌরী ও দেবগণ )

গৌরী ।—দেখ, ইন্দ্র ! দেখ দেখ আসিছে সমরে  
 পুনঃ হুই মহাদৈত্য বীরত্ব-আধার ;  
 আসিছে সৈনিককুল কাতারে কাতারে,  
 চলিয়া আসিছে বেন বিপুল সংসার ।  
 অগ্রভাগে রক্তবীজ রক্তিম-বরণ,  
 ভীম করবার ভূজে, ভয়ঙ্কর-বেশ,  
 বীরত্ব-বিস্তীর্ণ বক্ষ, পর্জিত-লোচন,  
 ব্যূহমধ্যে শুভানুজ নিশুভ শূরেশ ।  
 ভয়ঙ্কর ভাবে দৈত্য পশিতেছে রণে ;  
 রক্তমূর্তি রক্তবীজ, বীরেশ নিশুভ,  
 বিপুল ব্যূহের মাঝে উন্নত হুজনে,—  
 সাগরের মাঝে বেন বৃক্ষ জলন্তস্ত ।  
 সাবধানে ধর বজ্র, ওহে বজ্রধর !  
 সাবধানে ধর অন্ত, হে অনরগণ !

করিবে বিষম দৈত্য ভীষণ সমর,

দৃঢ় করি ধর নিজ নিজ প্রহরণ ।

ইন্দ্র ।—বাম্পের প্রভাবে যথা উঠে ব্যোমধান  
উন্নত আকাশে ; মাতঃ ! তোমার প্রভাবে  
পাইব আমরা পুনঃ সে স্থখের স্থান—  
অমর-নিবাস, নাশি হরস্ত্র দানবে ।  
অটল হইয়া আজি যুঝিব, জননি !  
আর কি হারাই দ্বিক এ রণসাগরে ?  
কাণারী যখন তুমি, শক্রি ! আপনি,  
কেন না করিব রঙ্গ আজি এ সমরে ?

গৌরী ।—ইন্দ্র ! দেবপ্রাজমত এই কথা বটে !  
অমর যেমন মোরা, যদ্যপি অটল  
হই রণে, তবে বল, মোদের কে আঁড়ে ?  
ধর তবে অস্ত্র, আর বিলম্বে কি ফল ?

### রক্তবীজের প্রবেশ ।

রক্ত ।—আক্রম, হে সৈন্যগণ ! দেবসৈন্যগণে,  
সৈন্যে সৈন্যে ঘোর রণ বাজুক এখন,  
সদেবে বামারে আমি আক্রমি এখানে,  
অমরের আশা আজি করি উৎপাটন !  
এস, হুর্গে ! বিলম্বেতে নাহি প্রয়োজন,  
শিবানি ! যুঝহ এবে সহ শৈবদল,  
আদ্যাশক্তি ! শক্তি তব দেখাও এখন,  
রক্তলে ! চিত্তহ এবে আপন মঞ্চল ।

রাজাভূজ সহ ইন্দ্র পশুন সমরে,  
একা একা যুঝি এস তোমায় আমার,  
হৃদ-যুদ্ধে, জগদ্বৈর ! আহুনি তোমারে ;  
রণধর্ম রেখো, আর কি কব তোমায় ।

গৌরী ।—মৃত্যু ডাকিতেছে তোমা শমনের পাশে,  
যাও হুয়া তথা তবে চিরশান্তি-আশে ।

( উভয়ের যুদ্ধ ; গৌরীর পুনঃ পুনঃ আঘাতে রক্তবীজের  
শত শত রক্তবীজের বল ধারণ )

( গৌরী পরাস্ত )

রক্ত ।—আদ্যাশক্তি ! কাঁপিতেছ কেন থরথরে ?  
এই কি শক্তির কাজ রাখিলে সংসারে ?  
নিবার সময়প্রাপ্তি জগকাল-তরে,  
না প্রহারি অস্ত্র মোরা নিরস্ত্র শরীরে ।

[প্রস্থান ।

গৌরী ।—এ কি অসম্ভব আজ করি দরশন !  
বিন্দুমাত্র রক্তপাত হইতে বীরের,  
শত-রক্তবীজ-বল করিছে ধারণ,  
আশ্চর্য বিক্রম হেরি এই অহুরের !  
উগ্রচণ্ডা শক্তি মোর ব্যর্থ হল আজ,  
হায়, পড়িলাম এবে বিষম সঙ্কটে !  
কোথা গেল দেবদল সহ দেবরাজ,  
সুমনসা লই এবে কাহার সিকটে ?

কোথা, পদ্মে ! প্রিয়সখি ! এস একবার,  
 স্নমজ্ঞা উপদেশ দেহ আসি এবে,  
 কেমনে দুর্দম দৈত্যে করিব সংহার,  
 অস্থির হয়েছি, সখি ! দৈত্যের প্রভাবে ।

দেবগণের প্রবেশ ।

বল, ওহে সমবেত অমর সকল !  
 কেমনে অশুরকুল হইবে বিনাশ ?  
 কেমনে নিবিবে ঘোর রোরব অনল ?  
 হায়, বুঝি না পারিছ পুরাইতে আশ !  
 শোণিতাজ্জ'দেহ মোর দেখ, দেবরাজ !  
 পরাস্ত হয়েছি, হায় ! অশুর-প্রভাবে,  
 প্রথরা শক্তি মোর বার্থ হলো আজ,  
 কি আর বলিব আমি, দেখেছ ত সবে !

ইন্দ্র ।—অদ্ভুত-বিক্রম দৈত্য, অজের সময়ে,  
 দেখেছি সকলি, মাতঃ, কি বলিব আর !  
 কেমন তেজস্বি-রক্ত বহে তার শিরে,  
 বলিতে না পারি ;—বিনুন্মাত্র পাতে তার  
 শত-রক্তবীজ-বল ধরে বার বার !  
 না জানি সমরে, মাতঃ, কি হয় এ বার !

পদ্মার প্রবেশ ।

পদ্মা ।—কেন এ দুর্গতি, দুর্গে ? আহা, মরি মরি,  
 জরজর কোমলাঙ্গ তীক্ষ্ণ অস্ত্রাঘাতে !  
 এ মন্ত্রণা কে তোমায়ে দিল, গো শঙ্করি ?

এসেছ মৃণালিনী পাষণ্ড ভাঙিতে ?  
 পরিহর কমলীর মোহিনী মূর্তি,  
 প্রলয়-সংহার-মূর্তি করহ ধারণ,  
 লৌহ-ধারে লৌহ এবে কাঠ, ভগবতি !  
 সূচীবেধে মরে কি গো প্রমত্ত বারণ ?  
 ভূমে যাহে রক্তবিন্দু না পড়ে উহার,  
 এ হেন উপায় কোন কর, হৈমবতি !  
 রক্তবীজ-রক্ত-সহ এই বসুধার  
 বিশেষ সম্বন্ধ আছে, জান না কি, সতি ?  
 সর্বভূকে রসনাগ্রে রাখ, গো রুদ্রাণি !  
 বিন্দুমাত্র দৈত্য-রক্ত না পড়িতে ভূমে  
 নিজগুণে অগ্নিদেব ডঙ্কণ অমনি,—  
 এই মাত্র সতুপায় এ সমরে, উমে !  
 ধর, দেবি ! কালীমূর্তি ঘোরা ভয়ঙ্করা,  
 কালিমায় ভ.ক গুই সূচার বরণ,  
 শত গুণে এ মূর্তি কর গো প্রধরা,  
 সুল-ধারে কর, সাধি ! পাষণ্ড ছেদন ।  
 ডাক বন্ধ, রক্ত, মাতৃ, পিশাচের দলে,  
 ধরায় দানব-রক্ত না হতে পতিত,  
 শূন্যে শূন্যে থাকি পান করুক সকলে  
 রক্তবীজ দানবের প্রভঞ্জন শোণিত ।  
 ইহা ভিন্ন রক্তবীজ হবে না বিনাশ,  
 অন্যথা—ছাড়হ এই সময়ের আশ ।

গৌরী।—ডাক তবে স্বপ্ন, রক্ষ, শিখাচের দলে,  
সংহার-মুরতি আমি ধরি রণস্থলে ।

[দেবগণ ও গৌরীর প্রস্থান ।

(অককার—মেঘগর্জন ও বজ্রাঘাত)

রক্তবীজের প্রবেশ ।

রক্ত ।—যোরতর ঘনঘটা গগনমণ্ডলে,  
উন্মত্ত-দার্মিনী-নৃত্য ঘনরাশি-কোলে !  
ভীষণ প্রলয় ঝড়ে, বিশ্ব বুঝি যায় উড়ে,  
খড় খড় ঘোর নাড়ে, ঘোর নিশাকালে,  
গর্জিতেছে অষ্ট বজ্র মিলি এককালে !  
গর্জিতেছে প্রভঞ্জন ভীম বেগে কুবি,  
উড়াইছে রণস্থলে রণরক্তরাশি ;  
রক্তে ডুবাইতে সৃষ্টি, করিছেন রক্তবৃষ্টি,  
ত্রিলোক-সংহার-কর্ত্তা কৈলাসেতে বসি ;—  
ভয়ঙ্কর-বেশে দেখা দিল এ তামসী ।

( নেপথ্যাভিযুগে )—

এ কি, এ কি !—

ভয়ঙ্করা কালী এ যে রণে দিল হানা,  
লট পট কেশজাল করালবদনা,  
ভয়ঙ্কর হহকারে, কাঁপাইছে চরাচরে,  
ভীম-ভূমে ভীম-অস্ত্রে বাজিছে ঝঞ্ঝা,  
প্রলয়-সংহার-সৃষ্টি বিষোর-বরণা ।

জুহুটি-বিভক্ত মুখে অটু অটু হাস,  
 বিশ্বনাথী কালানল লোচনে প্রকাশ,  
 লোল-জিহ্বা লক্ লক্, ভালে অগ্নি ধক্ ধক্,  
 কড়মড় ভয়ঙ্কর বিকট দশন,  
 দৈত্য-নাড়ী-নাথ-অস্থি ভীষণ ভূষণ ;  
 শব-মুণ্ড-মালা গলে, বিশ্ব-বিনাশিনী,  
 ভীমা ভীম-প্রিয়া ভীম ভীষণ-ভাষিনী !  
 ভৈরব পিষাচদলে, যুষ্টিতেছে পালে পালে,  
 সঙ্গিনী—যোগিনী মাতৃ বিকট-হাসিনী,  
 ছিন্ন ভিন্ন দৈত্য-দল-মুণ্ড-বিনাসিনী ।  
 ঝর ঝর মুণ্ডমালা ঝরঝর শোণিত,  
 পুলকে করিছে পান প্রেত অগণিত,  
 পদতরে টলমল, স্বর্ণ মর্ত্য রসাতল,  
 স্বকৃদরে রক্ত-জ্যোত বেগে প্রবাহিত,  
 অকাল-প্রলয়-মূর্তি আজ উপনীত !  
 দেব-রণ-বাদ্য বাজে ভয়ঙ্কর রবে,  
 ভয়ঙ্করা মহাকালী পশিলা আহবে,  
 নির্ভয়ে দিব এ প্রাণ, কালী-পদে বলিদান,  
 পলায়ে কলক কভু রাখিব না ভবে,  
 পলাইলে দৈত্যনাথ রক্ত্রেশ রুবিবে ।

সঙ্গিনীদল সহ কালিকার প্রবেশ ।

এস, গো রুদ্রাণি ! শিব ! প্রবেশ সমরে,  
 আদ্যাশক্তি ! শক্তি এবে দেখাও আমারে,



নিখিল-প্রলয়ঙ্করী, সংহার-মুরতি ধরি,  
 এসেছ, শিবানি ! আজি বহিতে শৈবেরে,  
 দেখি, হুর্গে । বাঁচি কিম্বা মরি তব করে ।  
 গৌরী ।—কালপূর্ণ দৈত্য । তোর বিলম্বে কি কাজ ?  
 শেষ আসি ধরেছিল করে তুই আজ ।

(যুদ্ধ ; রক্তবীজের পতন ; রক্তবীজের ছিন্নমুণ্ড লইয়া  
 কালিকার রক্তপান ; পিশাচদলের রক্তবীজের  
 দেহস্থ রক্ত সমুদায় পান )

### নিশুভের প্রবেশ ।

নিশু ।—এ কি, হুর্গে ! এ কি বেশ ! চিনিতে না পারি,  
 প্রলয়-সংহার-মূর্তি ধরেছ, শঙ্করি !  
 বরণ কালিম্বাসর, লোহিত লোচনত্রয়,  
 দৈত্য-মুণ্ড-মালা গলে, দৈত্য চন্দ্রাস্বরি,  
 নাশিয়াছ রক্তবীজে তুমি, রুদ্রেবারি !  
 দানবকুলের আশা নাহি দেখি আর,  
 হুর্গাকরে দৈত্যকুল হল ছারখার,  
 বিনাশিতে শৈবদলে, শিবানী সমরস্থলে !  
 ভীম ভুজে ধড়া, দৈত্যে করিতে সংহার,  
 বুঝিলাম দৈত্য-শূন্য হবে এ সংসার !  
 গৌরী ।—দৈত্যকুল নিহ্নলিতে মকর আমার,  
অচিরেই দৈত্যকুল করিব সংহার ।

নিশু ।—তথাপি গো প্রাণপণে, মুকিব তোমার সনে,  
 দেখি উগ্রচণ্ডা শক্তি কালিকা তোমার !  
 এস, হুর্গে ! বিলম্বেতে কিবা ফল আর ?

(যুদ্ধ ; দেবগণের প্রবেশ ; সকলের এককালীন  
 অস্ত্রাঘাতে নিশুশ্বের পতন ও মৃত্যু)

— — —

# বঠ অঙ্ক ।

## প্রথম দৃশ্য ।

উত্তের অন্তঃপুরস্থ দেবালয় ।

(মহাদেবের মন্দিরের সম্মুখ)

শান্তা ও শুভ্রার প্রবেশ ।

শান্তা ।—অকস্মাৎ কেন মনে জ্বলিল আগুন ?

দেখিতে দেখিতে, হায়, হইছে বিগুন !

অকস্মাৎ কেন, দিদি ! পরাণ উঠিল কাঁদি ?

না জানি কি সর্বনাশ ঘটিল এখন !

আপনি হতেছে মন হুঃখেতে মগন !

না বলিয়া ছদ্মবেশ গেলেম সমরে,

অকুল পাথারে, হায়, ফেলি অভাগীয়ে,

প্রেমচিহ্ন ছাড়ে রাখি, ছদ্-পিঞ্জরের পাখী

উড়িয়া গিয়াছে, হায়, ছাড়ে শেল হানি !

আর কি পাইব, আমি অর্থের বামিনী ?

শুভ্রা ।—শান্ত হও, শান্তা ! তুমি হয়ো না ব্যাকুল,

হেন হীনভাগ্য কভু নহে দৈত্যকুল ।

ব'স তুমি মোর পাশে, পূজি আমি ব্যোমকেশে,

এ দুর্গমে দুর্গাপতি করিবেন দয়্য,

সাহি জানি কেন এত বাম মহামায়া !

শাক্তা ।—সারা নিশি নিজা নাই নয়নে আমার,  
 দেখেছি কুস্প কত কি কহিব আর !  
 দেখিয়াছি রণরঙ্গে, চৌষটি যোগিনী-সঙ্গে  
 কাল-প্রলয়ের বেশ শিবানী উমার,  
 নাশিছেন দৈত্যদলে করি মহামার !  
 কালানলবর্ষা ঘোর ঘূর্ণিত-লোচন,  
 হানিছেন তীক্ষ্ণ বাণ ধরি শরাসন,  
 ঘোর তরঙ্গর দৃশ্য, শোণিত-সাগরে বিশ্ব  
 ডুবাইতেছেন ভীমা ক্রোধের উত্তেজে ;  
 অসি'ঘাতে নাশিলেন দেবী রক্তবীজে ।  
 ঘোর-ঘূর্ণ-বায়ু-সম ঘূরি রণস্থলে,  
 মহামারে নাশিছেন দৈত্যদল বলে,  
 করে দৈত্যমুণ্ড ঝোলে, দৈত্যমুণ্ডমালা গলে,  
 বিকীর্ণ মূর্দ্ধজ-জাল, চরণ চঞ্চল ;—  
 না জানি নাথের কিবা হল অমঙ্গল !

শাক্তা ।—ব্যাকুলা হয়ো না, শাক্তা ! শান্ত কর মন,  
 কপালে বা আছে, তাহা কে করে খণ্ডন !  
 বিধির নির্বাক বাহা, অবশ্য ঘটবে তাহা,  
 দৃঢ় হও, হয়ো না ক বিষাদে মগন,  
 বা আছে হুগার মনে ঘটবে এখন !

(নেপথ্যে হৃদুভিক্ষানি)

শাক্তা ।—অকস্মাৎ কেন এই হৃদুভি বাজিল !  
 আবার কে বল, দিদি, সমরে সাজিল ?

দূরে কোলাহল ঘোর,—ভেঙেছে কপাল মোর !

হায়, দিদি, সর্বনাশ হয়েছে আমার !

শুভ্রা ।—কাল-রণে বুঝি সব হলো ছারখার !

ব্যস্তভাবে শুভ্রের প্রবেশ ।

শুভ্র ।—(মন্দিরস্থ শিবমূর্তির প্রতি করষোড়ে)—

দৈত্যানাথ ! বিশ্বস্তর ! পিনাকী ! ত্রিশূলী !

তোলানাথ ! থেক না ক এ কিকরে ভুলি ।

( শুভ্রার প্রতি )—

চলিছ দেখিতে রণে হুর্গার শোণিত,

এই বুঝি শেষ দেখা তোমার সহিত !

শুভ্রা ।—কেন, নাথ ! তুমি কেন বাইছ আবার,

সমরে ত গিয়াছেন দেবর আমার ?

শুভ্র ।—দেবর তোমার আর নাহি ভূমণ্ডলে,

প্রাণ ত্যজিয়াছে বীর কালিকার শেলে !

শান্তা ।—ওগো মা !—কি হল ! এই ছিল কি কপালে !

(পতন ও মূহূহ)

শুভ্র ।—ধন্য সাক্ষি ! ভাগ্যবতী তুমি এ সংসারে—

যদি প্রাণ সঁপে থাক শমনের করে ।

শুভ্রা ।—(শান্তার নিকটস্থ হইয়া)—

নাথ !

তাহাই হয়েছে, দেখ নিম্পল শরীর,

চকল নয়ন দুটি নিমীলিত—শির !

পতির বিষ্ময়-শোকে, আম্রাত কোমল মুকে

লাগিল বিষম, প্রাণ ত্যজিল ভগ্নিনী—

এড়াইল সব জালা পতি-সোহাগিনী !

ভক্ত ।—বুঝিলাম ভাতৃজায়া বড় ভাগ্যবতী,  
বড় দয়া বৃদ্ধীটির শাস্তা সতীপ্রতি ।  
যা হোক, আদেশ এবে কর প্রহরীরে,  
রাখিতে শাস্তার দেহ ক্ষণকাল তরে ;—  
রয়েছে ভাতার দেহ সমর-প্রাঙ্গনে,  
ভাতৃজায়া-দেহ এবে থাকুক এখানে ;  
বলি দিব প্রাণ আমি কালিকার শূলে,  
শাস্তার, ভোমার দেহ যাবে রণস্থলে,—  
চারি দেহ দক্ষ হবে এক চিতানলে !

পরিচারিকাদ্বয়ের প্রবেশ ।

লয়ে যাও শাস্তা-দেহ শাস্তার মন্দিরে,  
যাও, রাখ গিয়ে ইহা ক্ষণেকের তরে ।

[শাস্তার দেহ লইয়া পরিচারিকাদ্বয়ের প্রস্থান ।

ভক্ত ।—কি করিলে, কি করিলে, হৃদয়-ঈশ্বর !

সর্বনাশ হল,—ছাড় ছাড় এ সমর !

দৈত্যকুল হল ধ্বংস, ছারখার দৈত্যবংশ,

ছাড় এ সমরলিপ্সা—কাজ নাই আর,

রুদ্রাণী উদ্যতা আজি নিধনে ভোমার !

চল যাই ধরি গিয়ে মায়ের চরণ,

অভয়-চরণে চল লই গে শরণ,

গুরুপত্নী গৌরীসনে, যেও না—যেও না রণে,

রুধিবেন ত্রিপুরারি দেব ত্রিলোচন ;—

চল দুই জনে ঘাই কালিকা-সদন ।

শুভ ।—হায়, দৈত্যকুলেন্দ্রাণি ! এই কি উচিত বাণী

তোমার এখন ? হায়, গিয়াছে সকলি,—

হারিয়েছি ভ্রাতা, জ্ঞাতি, বান্ধব-মণ্ডলী !

জীয়ে রব দগ্ধ হতে, চিরশোক-অনলেতে ?

শুভ-বৃক্ষপত্র-সম থাকিব কি পড়ি,—

সংসার-বৃক্ষের তলে যাব গড়াগড়ি ?

হাসিবে যে দেবরাজ, ত্রিসংসার দিবে লাজ,—

কখন না, কখন না—কখন না হবে,

দেখিব, দেখিব আজি কি হয় আহবে ।

শিবানীর রূপে প্রাণ ফাইবে আমার,

ঘুমিবে আমার বশঃ এই ত্রিসংসার ।—

দয়াময় ! দৈত্যনাথ ! স্মরিয়া তোমার

চলিলাম চায়ুণ্ডারে ভেটিতে সমরে ।

[ প্রস্থান

(বারিপূর্ণ ঘট লইয়া শুভার শিব-সম্মিথানে স্থাপন ; শুভার

হস্তচ্যুত হইয়া ঘট পতিত ও ভঙ্গ হওন)

শুভা ।—( কাতরা হইয়া )—

কেন না নিলেন পূজা আজি ত্রিলোচন ?

যোর অমঙ্গল আজি করি দরশন !

ভাঙ্গিল মঙ্গল-ঘট, ভাঙ্গিল হৃদয়-ঘট,

দানবকুলের ভাল না দেখি এখন,

হে দেব ত্রিপুর-অরি ! শিব ! সতী-পতি !  
 কেন এত অবহেলা দৈত্যকুল-প্রতি ?  
 কৃপাময় কৃপাধার ! কেন কৈলে ছারখার  
 তোমার রক্ষিত ষত দিতির সঙ্গতি ?  
 তোমা বিনা নাহি যে গো দৈত্যদের গতি ।  
 উঠেছিল মহোন্নতি-মার্গে দৈত্যকুল,  
 দিয়াছিলে দৈত্যকূলে ঐশ্বর্য অতুল,  
 এবে তব কৃপা-সরঃ, শুকায়েছে, বিশ্বস্তর !  
 মীনসম হুঃখ-পঙ্কে পেতেছি যাতনা,  
 দলিছেন পদতলে দেবী ত্রিনয়না !  
 আশার অর্পবধান, ভেঙ্গে হলো ধান ধান,  
 প্রলয়-সমর-ঝড়ে হেলায় তোমার,  
 ডুবিমু অতল জলে সকলে এ বার !  
 দানবনিকরে রক্ষ, দানব-রক্ষণ !  
 ডুবাও না, দয়াময় ! এই নিবেদন ।  
 (নয়ন মুদিত করিয়া ধ্যান)

(সচকিতে)—

এ কি ! এ কি !—

এ কি ভয়ঙ্কর আজ করি দর্শন,  
 নাহি আশুতোষ-মূর্তি হরের এখন !  
 লট পট জটাজাল, গরজে কবিনী কাল,  
 ত্রিফল ত্রিশূল করে আকার ভীষণ,  
 ক্রোধাগ্নি জলিতে ডালে বিশ্ববিনাশন ।



প্রভাতের চন্দ্র বখা বিবর্ণ বরণ—  
 তারাদল-হারা ;—বিরহিত সঙ্গিন,   
 জীবিত-ঈশ্বর মোর, মরি সমরেতে যোর,   
 ভগ্নচিত্ত, হায়, এবে হতাশ-নয়ন !—  
 কি করিলে, কি করিলে, দেব ত্রিলোচন !  
 এতই তোমার ছল ! এই কি ভক্তির ফল  
 ফলিল এখন ? আর সহে না অন্তরে,  
 বাই রণে, দেখি গিয়ে হৃদয়-ঈশ্বরে ।

[প্রস্থান।

## দ্বিতীয় দৃশ্য ।

যুদ্ধস্থল ।

## শুভের প্রবেশ ।

শুভ ।—ভগ্ন বখা তুঙ্গ শৃঙ্গ প্রলয়ের ঝড়ে,  
 পতিত ধ্বলোচন মুদিত লোচনে ;  
 চণ্ড মুণ্ড দুই ভাই পড়িয়া অসাড়ে,  
 বিদূরিছে রণপ্রাপ্তি যেন ধরাসনে ;  
 নিপতিত রক্তবীজ রক্ত-শূন্য কায়,  
 ধরণী কাঁপিত সদা যার পদভরে,  
 বাহু বিস্তারিয়া এবে সেই বীর, হায়,  
 আশ্রয় ধরার কাছে মাগিছে কাতরে !

নিপতিত ধরাপৃষ্ঠে প্রাণের সোদর,  
 শতধা বিকৃত বক্ষ ভাসিছে শোণিতে,  
 (হিমাচল-অঙ্গে যেন শোণিত-নির্ঝর)  
 দেখিছে আমারে যেন স্থির-নয়নেতে !  
 কি কাজ সংসারে আর কি কাজ জীবনে !  
 ত্রিলোকের আধিপত্যে কি সুখ(ই) বা আর !  
 হারাইয়া ভ্রাতা, জ্ঞাতি, আত্মীয়, স্বজনে,  
 একাকী কি সম্ভরিব শোক-পারাবার ?  
 সুখের সাগর মোর শুকায়েছে, মরি !  
 প্রমোদ-উদ্যান ত্যজি' কে করিতে চাহে  
 মরুভূমে বাস ? আর সহিতে না পারি  
 বিষম যন্ত্রণা বন্ধু-বান্ধব-বিরহে !  
 লই আগে প্রতিশোধ শাস্তিয়া গৌরীরে,  
 দ্বিই আগে রসাতল ত্রিদিব-প্রদেশ,  
 ছিটাই কালীর কালি আগে এ সংসারে,  
 অবশেষে করিব এ যন্ত্রণার শেষ ;—  
 ওই আসিতেছে কালী ভয়ঙ্কর-বেশে,  
 দেখি আজ এ সমরে কে কারে বিনাশে !

শুভের প্রস্থান ; নেপথ্যে যুদ্ধ ; গৌরীর  
 কেশ ধারণ করিয়া পুনঃপ্রবেশ ।

শুভ ।—রক্ষ, আদ্যাশক্তি ! এবে রক্ষ আপনাবের,

কেশ ধরে শূন্যমার্গে বুরাব তোমারে ।

গৌরী ।—কোথা, ওহে মহাযোগী—গৌরীপতি—হর !

যোগ ভঙ্গ করি ক্ষণ হের এ দাসীরে;  
 বিষম সমরে, নাথ ! হয়েছি কাতর,  
 যায় বুঝি প্রাণ হুঁষ্ট দানবের করে !  
 এ দাসীরে দেহ বল, দেব ত্রিপুরারি !  
 পতির বলেতে বলী অবলা সতত,  
 এ হেন লাঞ্ছনা আর সহিতে না পারি  
 কেশে ধরে দৈত্য মোরে ঘুরাতে উন্মত্ত !

( শূন্য মহাদেব )

মহা ।—অরে রে বর্বর শুভ্র ! হুঁষ্ট দৈত্যাধম !  
 হরের প্রদত্ত বর স্থগিত করিলি ?  
 শঙ্করের অনুগ্রহে কৈলি অপমান ?  
 ত্রিদিবের আধিপত্য—স্বর্ণ-সিংহাসন—  
 অতুল ঐশ্বর্যরাশি লভিয়া হুম্মতি  
 তৃপ্ত নহ তাহে ? মত্ত হয়ে অহঙ্কারে,  
 অবশেষে সতী-কেশ করিলি ধারণ ?  
 আমার বলেতে বলী,—অবহেলি তাহা,  
 সতী-অপমানে আজ হইলি প্রবৃত্ত ?  
 অহঙ্কার আজি তোর চূর্ণিব, কুমতি !—  
 হরিলাম আমি তোর সকল শকতি ।

(মহাদেবের অন্তর্ধান)

শুভ্র ।—(সতীর কেশ ত্যাগ করিয়া)—

বুঝিলাম—বুঝিলাম, হায় রে এখন,  
 আর রক্ষা নাহি মোর—বুঝিষু নিশ্চয় !

বাম আজি অভাগায় দেব ত্রিলোচন,—  
 না পারি তুলিতে আর নিজ ভুজঘর !  
 বুঝিহু সংসার, হায়, বুধা মায়াঘর,  
 বেষ্টিত সকলে ভবে খোর মায়াজালে,  
 চিরোন্নতি অনিবার কেহ নাহি পায়,  
 স্বল্প দিন তরে সব এ ভবমণ্ডলে ।  
 স্বল্প দিন—স্বল্প দিন, হায় রে সকল !  
 নির্ঝাণ হইল এবে দৈত্য-দর্পানল !

বেগে শুভ্রার প্রবেশ ।

শুভ্রা :—( গৌরীর চরণে পতিত হইয়া )—

রক্ষ রক্ষ, রক্ষাকালি ! রক্ষ এ দাসীরে,  
 রূপা কর, কুশাময়ি ! ক্ষম, ক্ষেমকরি !  
 ব'ধ না—ব'ধ না, মাতঃ, মোর প্রাণেশ্বরে,  
 জগদম্বে ! তুমি গো মা জগত-ঈশ্বরী ।  
 বধিবে নাথেরে যদি, বধ আগে মোরে,—  
 ঘুচাও জঞ্জাল আগে,—লতা পাতা কাটি,  
 অতঃপরে, জননি গো, কাট তরুবরে ;  
 রক্ষা কর—ছাড়িব না এ চরণ দুটি ।  
 গলায় পা দিয়ে, দেবি ! বধ আগে মোরে,  
 কিম্বা হান ভীম শেল হৃদয়ে আমার,  
 তার পর ব'ধ তুমি দমুজ-ঈশ্বরে,  
 চরণে চরম-ভিক্ষা এই গো আমার ।  
 শুভদা বরদা তুমি জগত-জননী,  
 এই কি তোমার কাজ ! বিনা অপরাধে

আপন সম্মানগণে নাশিলে, শিবানি !  
 শৈবদলে, দয়াময়ি, নাশিলে অশ্বাধে !  
 এই কি উচিত তব ? একেরে তুষিলে  
 অপর সম্মানে বধি ? কি দোষে গো দোষী,  
 বল, এ দানবকুল ও পদ-কমলে ?  
 বল, কি দেখেছ হেন অপরাধরাশি ?  
 কি দোষ পাইয়া বল—বল, গো ঐশানি !  
 ধরিলে সংহার-মূর্ত্তি দৈত্যকুলপ্রতি ?  
 এই কি তোমার ধর্ম্ম, জগত-জননি ?  
 শিবভক্ত শৈবকূলে নিমূলিলে, সতি !  
 বরদে গো ! আর কিছু চাহি না চরণে,  
 জীবিতের প্রাণ মোর ভিক্ষা দেহ মোরে !  
 ত্রিলোকের আধিপত্য, স্বর্গ-সিংহাসনে  
 চাহি না আমরা, উহা দেহ বাসবেরে ।  
 হয়ে রব চির দিন ইন্দ্র-অনুগত,  
 ত্রীচরণে এই শেষ ভিক্ষা মাগি, মাতঃ !

শুভ ।—হেন নীচ অভিলাষ কেন তব মনে  
 দৈত্যকুলেন্দ্রাণি ? হায়, চাহ বাচিবারে  
 চিরকাল হীনভাবে ইন্দ্রের অধীনে ?  
 মরিতে ত হবে, শির কি আছে সংসারে ?  
 দৈত্যকুল-চূড়া আমি ত্রিদশ-দমন,  
 পদতলে স্থিত মোর এই ত্রিসংসার,  
 বাসব কিস্কর মোর জানে ত্রিভুবন,  
 বাসবের অধীনতা করিব স্বীকার !

(গৌরীর প্রতি)—

কি আর ভাবিছ, দেবি ! বধ ত্বর্য মোরে ;  
না চাহি ধরিতে আমি আর এ জীবন !  
কি আর আমার তুমি রেখেছ সংসারে,  
নাশিয়াছ জ্ঞাতি, বন্ধু, আত্মীয়, স্বজন !  
মরিতে ত হবে এই নম্বর সংসারে,  
মরি তবে এই বেলা, জগত-জননি !  
গুরুপত্নী তুমি, মাতঃ, মরি তব করে  
বৈকুণ্ঠ-লোকেতে আমি যাই গো এখনি ।  
শুনেছি প্রতিজ্ঞা তুমি করেছ, ঈশানি !  
বিনাশিতে দৈত্যকূলে ; পাল সে প্রতিজ্ঞা ;—  
না হলে কলুষ তব ঘৃষিবে মেদিনী ;—  
তব পদে দিতে প্রাণ দেহ, দেবি ! আজ্ঞা ।  
ধর অস্ত্র, করি আমি সন্তানের কাজ,  
রাখি মাতৃ-পণ দিয়ৈ নিজ প্রাণ আজ ।  
(গর্জিতলোচনে গৌরীর প্রতি দৃষ্টি ; গৌরী নিরুত্তরা)  
ভবানি ! সন্মতি তব দিল গো নীরবে ;  
কি ফল বিলম্বে আর তবে, হর-রমে ?  
জগদম্বে ! দৈত্য-মাতঃ ! পড়ুক গো তবে  
শেষ-যবনিকা আজ দৈত্য-রক্তভূমে-!

(কালিকার শূলাগ্রে শুভ্রের পতন ও মৃত্যু)

(শুভ্রার পতন ও মৃত্যু)

যবনিকাপতন ।









